

唐文粹補遺

一
函
四
冊

蘇
子
舟
解
舟

PDG

唐文粹補遺卷第六目錄

文二

祭率府孫錄事文

陳子昂

祭楊盈川文

宋之問

爲伎人祭元十郎文

張說

還京次睢陽祭張巡許遠文

高適

祭幽獨君文

李道昌

祭伏波將軍文

李觀

衡州祭耆里渡溺死百姓文

呂溫

祭處士李君文

符載

祭故處州李使君文

杜牧

祭小姪女寄寄文

李商隱

奠陸龜蒙文

吳融

唐文粹補遺卷第六

吳江 郭麐 祥伯 纂

英山 金勇 仁甫 校

祭率府孫錄事文

陳子昂

維年月日朔某等謹以云云古人歎息者恨有志不遂如吾子良圖方興青雲自致何天道之微昧而仁德之攸孤忽中年而顛沛從天運而長徂惟君仁孝自天忠義由己誠不謝於昔人實有高於烈士然而人知信而必果有不識於中庸君不慚於貞純乃洗心於名理元常旣沒墨妙不傳君之逸翰曠代同仙豈圖此妙未極中道而息懷眾寶而未攄永幽泉而掩魄嗚呼哀哉平生知己疇昔周旋我之數子君之百年相視而笑宛然昨日交臂而悲今焉已失人代如此天道固然所恨君者枉天當年嗣子孤藐貧窶聯翩無父何恃有母惻焉嗚呼孫子山濤尙在稽紹不孤君其知我無恨泉途嗚呼哀哉尙饗

祭楊盈川文

宋之問

維大周某年月日西河宋某謹以清酌脯羞之奠敬祭於楊子之靈曰自古皆死不朽者文北河流液西岳吐雲叶神通契降精於君伏道孔門遊刃諸子精微博識黃中通理屬詞比事宗經匠史玉璞金渾風搖雲起聞人之善若在諸己受人之恩許之以死惟子堅剛氣陵秋霜行不苟合言不苟忘大君有命徵子文房余亦叨天隨君頡頏同趨北禁並拜東堂志事俱得形骸兩忘載罹寒暑貧病洛陽裘馬同弊老幼均糧自君出宰南浮江海余嘗苦饑今日猶在之子妙年香名早傳從來金馬夙昔崇賢門庭若市翰墨如泉千載之後聞而凜然死而不亡問余何傷傷予命薄益友零落生平之言幽顯相託痛君不嗣匪我孤諾君有兄弟同心異體陟岡增哀歸葬以禮旅櫬飄零於洛之汀我之懷矣感歎入冥見子之弟類子之形悼往心絕慰存涕盈古人有言一死一生昔子往矣追送傾城今子來也乃知交情惟郭是戚有崔不易來哭

來祭哀文在席帷席可依冰雪四滿家人哀哀賓徑微斷今我傷
悲情懃昔時子文子翰我緘我持子宅子兆我營我思子有神鑒
我言不欺我有絮酒子其飲之我亦引滿儻昭神期魂兮歸來聞
余此詞

爲伎人祭元十郎文

張說

維神龍三年月朔日故伎人伏十善謹以清酌少牢之奠致祭於
元十郎之靈淥流茂樹萍蘿是依山崩川竭魚鳥何歸恭維主君
高才達節賞心樂事風流不絕歌豔露華舞迴春雪幸持此技承
君餘悅綺羅脂粉嬌上春自言終代保情親寧知一旦君恩斷繁
弦清管爲何人懷主君之異願願徇命於九泉迫夫人之嚴旨遂
投足於他門生有十年之愛沒無一日之恩雖強容飾於新奉心
摧絕而不敢言君子廣德仁心必徧疇昔與君琴樽懼宴永懷蕙
歎俯憐荼苦錫以時珍申哀故宇廢車旣展祖奠斯開悲歌助挽
長袖承杯平居好此魂來不來心思往而莫遂足欲返而遲迴終

天地於此訣毒煩寃而難裁

還京次睢陽祭張巡許遠文

高適

維乾元元年五月日太子詹事御史中丞高適謹以清酌之奠敬
祭於故御史中丞張許二公之靈中丞體質貞正才掩羣豪詩書
自負州縣徒勞惆悵雄筆辛勤寶刀時平位下世亂節高賊臣通
逆國步驚騷兩河震恐千里嗷嗷投袂灑泣據鞍鬱陶全譙入宋
收梓捍曹心繫魏闕志清武牢帝曰嗟爾龍光豹韜憲台戎幕持
斧擁旄嗚呼予亦忝竊統茲介冑俄奉短書至夔狂寇裹糧訓卒
達曙通晝軍乃促程書亦封奏遂發趨勇俾驅烏獸將無止心兵
亦死鬪賊黨頻蹙我師旋漏十城相望百里不揅紘紘嘯聚兵鋒
亦奏積薪爲梁決岸成竇嗚呼當此虎敵豈無強鄰常時肝膽今
日越秦堅守半歲絕糧數旬柿椽秣馬糞紙飼人病不暇拯歿無
全身煎熬甲冑喙嚼膠筋慷慨艱險淒涼苦辛嗚呼我辭淮楚將
赴伊洛途出茲邦悲纏舊郭邑里灰燼城池墟落何九拒之崢嶸

皆二賢之制作聲蓋天壤氣橫遼廓讓死爭先臨危靡卻嗚呼四
字天亦難論萬夫開壁一旅纔存衰羸既竭力弱相吞陷阱織路
梯衝棧門土壕水合木柵雲屯居卽其敵突無其奔煙雲劔戟逼
側紛昏與求生而害義寧抗節以埋魂嗚呼悖逆殲潰干戈將止
海岳澄清朝廷郅理封功列爵懷黃拖紫傷哉二賢不預於此嗚
呼孀婦伶俜愛子追贈方榮賞延茲始寂寂梁苑悠悠睢水黃蒿
連接白骨填委思壯志於冥冥問遺形於荆杞列祭空城一悲永
矣

祭幽獨君文

李道昌

嗚呼萬古邱陵化無再出君是何人能閑詩筆何代而亡誰人子
姪曾作何官是誰仙室寂寞夜臺悲乎白日不向紙上石中隱出
桃源三月綠草垂楊黃鶯不轉猿聲斷腸不題姓字寧辨賢良嗚
呼痛哉歎惜先賢空傳經史終無再還青松嶺上嵯峨碧山

祭伏波將軍文

李觀

嗚呼伏波之生好兵自喜幼有壯節騰聲出仕定冊歸漢謨俞帝旨算無失畫功代可紀破斬徵側實平交趾來征蠻溪未卒而死小人赤口曷本於理惹苒南還明珠謗起乃收侯印爵不及子唯德不忘愛留社里築廟以祭人敬其鬼久而若新千載不毀詰詰啗啗易白成緇孔子義失助華不慈曾氏殺人母投於機居竊厥嫂陳平不疑申生寘毒晉有驪姬是以無極巧舌伍奢族夷孟子傷讒淒兮作詩公失其所梁松實爲何獨將軍自昔如斯故士有歷百代而不滅者嘗被訕於當時苟窺心而不作雖棄置其奚悲赫赫聖帝嘉賢命祠酒斝旣列神乎降思尙饗

衡州祭耆里渡溺死百姓文

呂溫

維元和五年歲次庚寅十月戊辰朔十七日甲申刺史呂某遣故衙前虞侯何防以豚酒蔬果致祭蘇昇陳演李寬秦陳甫魯餘之靈爾等五人感余誠信力輸公稅爭赴先期溪山阻深潦水暴至不忍欺我忘其險艱州令未明津渡不謹致此淪逝咎由使君興

言涕流痛念何及聊申薄酌兼致微贈代納殘稅皆余俸錢魂而有知諒此深意向饗

祭處士李君文

符載

良友三人來自蜀川身棲廬嶽氣屬雲天至寶多脆靈芝不堅君與王生早落窮泉當時食貧空禮從權殯宮蕭索二十餘年在風塵中觸故牽纏每懷曩昔深衷惻然頃亦有意祇承付託訪君姻族獲歸京洛賢舅緇褐外弟罷弱實恐歲時遂移舟壑神本尙簡禮貴適時卽其故地而窀穸之衛玠短命伯道無兒千秋拱樹我心傷悲嗚呼我李處士已而已而

祭故處州李使君文

杜牧

維會昌五年歲次乙丑某月日池州刺史杜牧謹遣軍事押衙王鏐謹以清酌庶饌之奠敬致祭於亡友李君起居之靈憶昔相遇兩未生鬚京師眾中跡猶甚疏一言道合盡寫有無我於宣城忝跡賓吏君隨幕府東下繼致復與友人故薛子威邂逅適願如相

爲期放論劇談各持是非攻強討深張矛鼓機怒或絕赫終成笑
嬉於後七年君拜左史來蜀西川我官補闕云愧我先拜章清代
蓋私我焉我有家事乞假南來循行里第君出離杯令弟在席恣
爲談諧耳熱膽張觥聯相狹我歸墜馬一支幾摧君來我坐側倚
旁偃持簡酸吟戲口猶開云君我殺以酒相加忌我之才及我南
去君刺池陽我守黃岡葭葦之場惟君書信前後相望辭意纖悉
勉我自強律我性情補短裁長一函每發沈憂并忘幸會交代浚
檝若飛江山九月涼風滿衣爲別幾時多少懼悲志業益廣不可
窺知長人之術首爲吏師縱酒十日舞袖傲垂語公之餘且及其
私許以季女配我長兒莫云稚齒可以指期各負少壯輕後會時
寓居宣城書札日馳一疾不起訃來猶疑嗚呼哀哉惟先僕射儉
德冠古凡二十年四領茅土所至所治曰人父母官俸餘半委庫
不取京師里第蓬茅數畝慶餘生君曰天爵補何聰明才智兮不
使施爲何付與之多兮折之何暴天陽地陰高厚相俸上有河漢

瓠天橫流百刻晝夜平分不饒皎不陰晦一月幾朝二男三女俗
率如此三男二女無有其地君子小人鼻目並列與小人校會無
百一於百一中以秀奪實凡稟陰陽生於其間陽常不勝賢者宜
難自古皆然欲復何言撫孤一弔拍棺一哭咫尺不遂涕下相續
期於沒齒盡力嗣子嗚呼哀哉伏惟尙饗

祭小姪女寄寄文

李商隱

正月二十五日伯伯以果子弄物招送寄體魂歸大塋之旁哀
哉爾生四年方復本族旣復數月奄然歸無於鞠育而未深結悲
傷而何極來也何故去也何緣念當稚戲之辰孰測死生之位時
吾赴調京下移家關中事故紛綸光陰遷貿寄瘞爾骨五年於茲
白草枯菱荒塗古陌朝飢誰飽夜渴誰憐爾之栖栖吾有罪矣今
吾仲姊返葬有期遂遷爾靈來復先域平原卜穴刊石書銘明知
過禮之文何忍深情所屬自爾沒後姪輩數人竹馬玉環繡襜文
褌堂前堦下日裏風中弄藥爭花紛吾左右獨爾精誠不知何之

況吾別娶已來嗣緒未立猶子之誼倍切他人念往撫存五情空
熱嗚呼榮水之上檀山之側汝乃曾乃祖松檟森行伯姑仲姑冢
墳相接汝來往於此勿怖勿驚華綵衣裳甘香飲食汝來受此無
少無多汝伯祭汝汝父哭汝哀哀寄寄汝知之耶

奠陸龜蒙文

吳融

大風吹海海波淪漣涵爲子文無隅無邊長松倚雪枯枝半折挺
爲子文直上巔絕風下霜晴寒鐘自聲發爲子文鏗鏘杳清武陵
深闕川長晝白間爲子文渺茫岑寂豕突禽狂其來莫當雲沉鳥
沒其去倏忽膩若凝脂軟於無骨霏漠漠澹涓涓春融冶秋鮮妍
觸卽碎潭下月拭不滅玉上煙

唐文粹補遺卷第七目錄

議 辨 讚 箴 銘 誠 說

昊天上帝及五帝異同議 長孫無忌

王去榮不宜赦罪議 韋見素

議復府兵 李泌

不載元韶事迹議 路隋

公獄辨 楊炯

壽顏子辨 皇甫湜

梁邱據讚 柳宗元

藥師如來繡像讚 呂溫

酒功讚 并序 白居易

詩賦讚 司空圖

溫泉箴 張說

文選樓銘 楊夔

兩觀銘 陸龜蒙

隋鼎銘 皮日休

臨終口授銘 王元宗

口兵誠 劉禹錫

交難說 李觀

觀八駿圖說 柳宗元

王夫榮不宜婦異類 韓良康

吳天土帝文正帝異同類 吳昇

蘇洵 雜錄 雜類

文粹 雜類 雜類

唐文粹補遺卷第七

吳江 郭麐 祥伯 纂

英山 金勇 仁甫 校

昊天上帝及五帝異同議

長孫無忌

依祠令及新禮並用鄭元六天之議圜丘祀昊天上帝南郊祭太
微感帝明堂祭太微五天帝臣等謹按鄭元此義唯據緯書所說
六天皆謂星象而昊天上帝不屬穹蒼故注月令及周官皆謂圜
丘所祭昊天上帝爲北辰星曜魄寶又說孝經郊祀后稷以配天
及明堂嚴父以配天皆爲太微五帝考其所說殊乖謬特深按周
易云日月麗乎天百穀草木麗乎地又云在天成象在地成形足
明辰象非天草木非地毛詩傳云元氣廣大則稱昊天據遠視之
蒼然則稱蒼天此則天以蒼昊爲體不入星辰之例且天地各一
是曰兩儀天尙無二焉得有六是以王肅羣儒咸駁此義又檢太
史圜丘圖昊天上帝外別有北辰坐與鄭義不同得太史令李滄

風等狀稱昊天上帝圖位自在壇上北辰自在第三等與北斗並列爲星宮內座之首不同鄭元據緯書所說此乃義和所掌觀象制圖推步有徵相沿不謬又按史記天官書等太微宮有五帝者自是五精之神五星所奉以其是人主之象故況之曰帝亦如房心爲天皇之例豈是天子乎周禮云兆五帝於四郊又云祀五帝則掌百官之誓戒唯稱五帝皆不言天此自太微之神本非昊天之祭又孝經惟云郊祀后稷別無圜丘之文王肅等皆以爲郊卽圜丘圜丘卽郊猶王城京師異名同實符合經典其義甚明而今從鄭說分爲兩祭圜丘之外別有南郊違棄正經理深未允且檢吏部式惟有南郊陪位更不別載圜丘式文旣遵王肅祠令仍行鄭義令式相乖理宜改革又孝經云嚴父莫大於配天下文卽云周公宗祀文王於明堂以配上帝則是明堂所祠正在配天而以爲但祭星官文違明義又按月令孟春之月祈穀於上帝左傳亦云凡祀啟蟄而郊郊而後耕故郊祀后稷以祈農事然則啟蟄郊天

自以祈穀謂爲感帝之祭事甚不經今請憲章姬孔取王去鄭四郊迎氣存太微五帝之祀南郊明堂廢緯書六天之義其方丘祭地之外別有神州謂之北郊分地爲二旣無典據理又不通亦請合爲一祀以符古義仍並請循附式令永垂後則謹議

王去榮不宜赦罪議

韋見素

法者天地大典帝王猶不敢擅殺而小人得擅殺是臣下之權過於人主也去榮旣殺人不死則軍中凡有伎能者亦自謂無憂所在暴橫爲郡縣者不亦難乎陛下爲天下主愛無親疏得一去榮而失萬姓何利之有於律殺本縣令列於十惡而陛下寬之王法不行人偷道屈臣等奉詔不知所從夫國以法理軍以法勝有恩無威慈母不能使其子陛下厚養戰士而每歲少利豈非無法邪今陝郡雖要不急於法也有法則海內無憂不克況陝郡乎無法則陝郡亦不可治得之何益而去榮末技陝郡不以之存亡王法有無家國乃爲之輕重此臣等所以區區願陛下守貞觀之法

議復府兵

李泌

府兵平日皆安居田畝每府有折衝領之折衝以農隙教習戰陳
國家有事徵發則以符契下其州及府參驗發之至所期處將帥
按閱有教習不精者罪其折衝甚者罪及刺史軍還則賜勳加賞
便遣罷之行者近不踰時遠不經歲高宗以劉仁軌爲洮河鎮守
使以圖吐蕃於是始有久戍之役武后以來承平日久府兵浸墮
爲人所賤者百姓恥之至蒸熨手足以避其役又牛仙客以積財
得宰相邊將效之山東戍卒多齎繒帛自隨邊將誘之寄於府庫
晝則苦役夜繫地牢利其死而沒入其財故自天寶以後山東戍
卒還者什無二三其殘虐如此然未嘗有外叛內侮殺帥自擅者
誠以顧戀田園恐累宗族故也開元之末張說始募長征兵謂之
曠騎其後益爲六軍及李林甫爲相奏請軍皆募人爲之兵不土
著又無宗族不自重惜忘身循利禍亂遂生至今爲梗屢使府兵
之法常存不廢安有如此下陵上替之患哉陛下思復府兵此乃

社稷之福太平有日矣

不載元韶事迹議

路隨

凡功臣不足以垂後而善惡不足以爲誠者雖富貴人第書其卒而已陶青劉舍許昌薛澤莊青翟趙周皆爲漢相爵列通侯而良史以爲齷齪廉謹備員而已無能發明功名者皆不立傳伯夷叔齊莊周墨翟魯連王符徐稚郭泰皆終身匹夫或讓國立節或養德著書或出奇排難或守道避禍而傳與周邵管晏同列故富貴者有所屈貧賤者有所伸孔子曰齊景公有馬千駟死之日人無得而稱焉伯夷叔齊餓死於首陽之下人到於今稱之然則志士之欲以光耀於後者何待於爵位哉富貴之人排肩而立卒不能自垂於後者德不修而輕義重利故也自古及今可勝數乎

公獄辨

楊炯

縉紳先生牧於東郡繩屬吏有公於獄者某適次於座乘間詰其所以爲公之道先生曰吾每窺辭牒意其曲直指而付之彼能立

具贖無不了吾意亦可謂盡其公矣某居席之末不敢以非是爲
決及退而辨其公巨傳曰君所謂否臣獻其可君所謂可臣獻其
否是欲彌縫其不至也及君可亦可君否亦否故平仲罪邱據踵
君之意叔向譏樂王鮒從君者也所以知詢於愚或有得也尺先
其寸或有長也皆庸其涓滴將助其廣大也況末世纖狡內荏外
剛烏有不盡其辭而能必究其情乎使居上者得其情屬蹕而詰
之可謂合於理未足言公也若居上者異於見遠於理亦隨而鞠
之取協於意所謂明於不法烏可謂公哉且不師古之言非不可
爲也爲之不能遠不由禮之事非不可行也行之不能久故君子
盡心法古動必本禮將遠而不泥久而不亂也若乃告諸獄任意
以爲明其屬徇己以爲公是使懷倖者有窺進之路挾邪者有自
容之門矣矧藜棘之內辛楚備至何須而不克而況承執政指其
所欲哉嗚呼欲人之隨意者吾見亂其曲直矣樂人之附己者吾
見汨其善惡矣而猶伐其治譽其公無乃瞽者衒別諸五色乎

壽顏子辨

皇甫湜

土與水火風雜爲千品萬殊大凡太虛之中形而有者皆主於土揮而動者皆主於風液而通者皆主於水躍而養者皆主於火天地之與稊米醯雞之與應龍雖殊大小必質四者具四者之性然後爲一物抑四者能爲質不能爲知者也動焉四不動焉四四者能質不能知有虛而靈者合焉以爲物知凡四者之合而有也而合乎是爲知若角若鱗若飛若走舉爲其屬不合於是爲無知若草若木若金若石舉爲其屬最靈者人人之中爲心心之知爲神人之生也質乎土風水火而心乎知其於死也氣旋於虛而反於土風水火之性各旋其所質固化而無矣若心之知則未知其處焉而人見其質之化也謂知亦從而亡豈不愚甚矣哉彼繇心所以知者虛而靈其不可爲無也較然矣其質也游冥而化遷者也夫心猶水也水清則撓而濁者不存存則不清心猶鏡也鏡明則塵埃不止止則不明聖與愚受於初一也聖人瑩其心而窒其誘

是以能照天下之理故其心清而定愚者負其心而薄於外是以閉天下之理故其心塵而結清而定者離其質也玲瓏乎太虛之中動而合則爲文王仲尼順而安則必始終天地塵而結者離其質也狂攘兮太虛之中轉而合於有則爲禽爲獸其於人也爲愚爲凡於草木者無所不爲矣雖欲少安得乎推是而言則彭祖爲夭而顏子爲壽盜跖爲殺而比干爲終

梁邱據讚

柳宗元

齊景有嬖曰梁邱子同君不爭古號媚士君悲亦悲君喜亦喜曷賢不讚卒讚於此媚余所仇激讚有以梁邱之媚順心狎耳終不撓厥政不嫉反己晏子躬相梁邱不毀恣其爲政政實允理時覩晏子食寡肉缺味憂其不飽告君使賜中心樂焉國用不墜後之嬖君罕或師是導君以諛聞正則忌讒賢協惡民蠢國圯嗚呼豈惟賢不逮古嬖亦莫類梁邱可思又況晏氏激讚梁邱心焉孔瘁

藥師如來繡像讚

呂溫

藥師如來像者予妻蘭陵蕭氏之所繡也貞元二十年予奉德宗
皇帝之命西使吐蕃辭高堂而出萬死介單車而馳不測國故遽
至戎情猜閉坎險一遇星霜再周夫人盥饋之餘膏鉛不御日亂
蓬首坐銷薜華異域無期良時自晚始怨冬缸之久而紅芳已闌
方苦夏景之長而碧樹將落書委塵篋跡淪苔階漸昧音容孰知
存沒黠龜不告因夢難徵觸慮成端沿情多緒黃昏望絕見偶語
而生疑清旭意新聞疾行而誤喜循環何極刻舟靡尋浩隔理求
窅非計得如聞西方有金界極樂藥師大雄散琉璃之寶光照河
沙之國土能度羣品出諸幽厄一念必應萬感皆通是用潛發慧
根妙求真相斷鳴機躬織之素染懿筐手續之絲盡瘁莊嚴彰施
采繡纏苦心於香縷注精意於鍼鋒指下而露洗青蓮思盡而雲
開白日然後練時潔室華設珍供夕炬傳照晨爐續煙齊獻至誠
泣敷懇願遂得慈舟密濟覺路潛引當道場發念之日是荒裔來
歸之辰幽贊冥符一何昭焯乃知織迴文之錦無補離憂登望歸

之臺空爲廢日與夫心諧妙理手結勝因進則有濟度之功退不
離清淨爲本從長擇善豈同日而言哉予感其志效爰用讚敘雖
在妻子亦無愧詞藏諸閨門永以傳信讚曰

地萬里兮天一極往無由兮來不得解脫願兮慈悲力五色繡兮
黃金飾澄氛昏兮圓相開湛水月兮蓮花臺慈眼睭兮獷心迴死
別離兮生歸來海爲田兮劫爲灰身念念兮無窮哉

酒功讚

井序

白居易

晉建威將軍劉伯倫嗜酒有酒德頌傳於世唐太子賓客白樂天
亦嗜酒作酒功讚以繼之其詞云

麥麩之英米泉之精作合爲酒孕和產靈孕和者何濁醪一樽霜
天雪夜變寒爲溫產靈者何清醕一酌離人遷客轉憂爲樂納諸
喉舌之內滄滄泚泚醜醜沉澆沃諸心胸之中熙熙融融膏澤和
風百慮齊息時乃之德萬緣皆空時乃之功吾嘗終日不食終夜
不寢以思無益不如且飲

詩賦讚

司空圖

知道非詩詩未爲奇研昏練爽憂魄淒肌神而不知知而難狀揮
之八垠卷之萬象河渾沈清放恣縱橫濤怒靈蹴掀鼈倒鯨纜空
擢壁瑤冰擲戟鼓煦呵春霞溶露滴鄰女自嬉補神而舞色絲屢
空續以麻絢鼠革丁丁熈之則穴蟻聚汲汲積而成垤上有日星
下有風雅歷詒一作詆自是非吾心也

溫泉箴

張不說

東山少連曰元冥氏之子曰壬夫妻祝融氏之女曰丁芊俱學水
仙是謂溫泉之神焉帝命之救萬靈盪滯結腑臟達膚腠泄下人
多賴之上帝是崇忤飛廉氏之佚女嫉之常欲大恩其功故入溫
泉必齊肅洗心戒以防患恕以利物含生之疾我願除祲三神嘉
之吹湯激邪珠連漚累滴汨揚華此其效也若入溫泉僻心穢行
惡言淫形居食失節動出躁輕二神醜之不匡人命飛廉佚女以
裾繫人是生疰芒風瘍眩齟之病夫有意之醫照合神理無恆之

醫身爲慾使莫之益傷之者至矣是以君子慎其微也

文選樓銘

楊夔

文選樓者梁昭明太子選文之地時逾四代年將五百清風懿號
藹然不泯況廣陵乃隋室故郡遺事斯存求之於今陳跡盡滅斯
猶巍巍久而益新其不由以學而立道者道則不朽以文而經業
者業則不磨乎宏農子經於是樓提筆路絕且慮夫不文不典者
肆而處乃泣以銘云

峩峩萬宇匪歌則舞美哉斯樓獨以文修自由名貴不以華致雖
超千古靡有顛墜孰堪其登必精必誠孰可以居必賢必明無聚
優以爲娛無習伎以稱榮吾恐其素德懷辱於冥冥

兩觀銘

陸龜蒙

兩觀雉門雖僭天子聖人在朝姦佞誅死姦首擲地姦血如水政
不得亂國是以理下及于祀澆風四起內在外賢舉世稱美赫奕
皇都象魏天倚豈無姦邪佩玉藥藥聖人弗生兩觀如砥以石鏡

辭著乎闕里

隋鼎銘

皮日休

隋氏有鼎其器非古以詐爲金以賊爲鑄以虐火煎四海以毒氣蒸九土天假唐力扛之仁地以澤撲虐火以德銷毒氣旣折其足又齧其耳噫戲聖王無畜茲器

臨終口授銘

王元宗

於戲昔有唐氏作吾中遇而生姓王名元宗字承眞本瑯琊臨沂人晉丞相文獻公十代孫陳亡過江先居馮翊中徙江都其肇錫考系則國史家牒具矣降年五十有五直垂拱二年四月順大衍之數奄忽而終終後可歸我於中頂舊居之石室斯亦墓而不墳神無不在耳且伊洛之間迺昔者周南之域吾祖上賓之地吾家得姓之鄉反葬中岳幾不忘本也舉手長謝亦復何言示人有終乃爲銘曰

馮馮太清悠悠太寧混沌無我其中有精忽然爲人吾何以停歸

於真宅此室冥冥不封不樹絕待忘情道無不在神無不經幽傳
祕訣默往仙京萬物共盡時哉乃形理通寂感陰聚陽并知常得
姓無狀無名闕一字體嵩石言追洛笙去來千洞驅馳八靈風雲聚
散山水虛盈谷神不死我本長生

口兵誠

并序

劉禹錫

余讀蒙莊書曰兵莫慘於志莫邪爲下缺然知志一作智士之傷夫
生也他日讀遠祖中壘校尉書曰口者兵也盡然知言之爲兵又
慘乎志因博考前載極其兩端夫志兵之薄人激烈抗憤不過無
從容於世耳口兵之起其形渥焉繇是知吾祖之言爲急作誠以
書於盤盂

五刃之傷藥之可平一言成疴智不能明人或罹兵道途奔救投

方效技思恐其後人或罹譖比肩狐疑借有紛解毀輒隨之故曰

舌端之孽慘乎楚鐵夷竄誠謀執戈以驅掩人誠智折筭以一作

詈賢者誨予信其有旨發言之難往古猶爾辨爲詐媒默爲德基

玉瀆不啟焉能瑕疵攀屢深居孰謂可嗤我誠於口惟心之門無
爲我兵當爲我藩以慎爲鍵以忍爲閤可以多食勿以多言

交難說

李觀

交之難兮久矣且苟合兮爲恥昔人病於無友嗟友不可以已矣
絕壑萬丈嶽嶽龍吟元雲遂興六合爲陰碧山嵌空虎嘯其中百
獸悍慄欻然長風夫物以類感何感不致交以心契何契不祕然
執可久之契先古稱利言求於斯不可易易二氣陶甄曰人是先
足矩地首規天大樸摧頽六情入焉一與一奪失其自然積有億
年人增險艱使我行無所之居無所安末流濺濺潰我素源源無
清流棄沈逐浮詐色自代僞心相求睢盱竭歡未竟成讎一日銷
落速如凜秋朝榮無遺俗態豈留獨見神岳寒柏千尋無儔直天
而生高於斗牛下睨羣植匪堪與侔可者爲交窮達不偷樂亦同
樂憂亦同憂生死循環其道率由破產作惠不相爲酬如斯之謂
也昔夷吾九合之策知者不孤巨卿千里之哭今也則無石父解

縛於齊相智蓄負慙於賈夫賈夫信微其可及乎知我則友何微之居古人奉交多不獲全耳餘之初刎頸慨然隱憫就辱激昂自堅及其據兵而坐勢必相危白刃可吹赤心乃攜憑怒相殺氣干虹蜺嗚呼噫戲交之難兮以利苟合忿深咆哮余常誠之不妄語交矧今之人兮實蒙虺蜥是故獨處兮而悲蠨蛸若歿者可振子願言與鄰驂吾祖之駕捧仲尼之輪義者友其義仁者師其仁不其善歟何滯於斯憂辛

觀八駿圖說

柳宗元

古之書有記周穆王馳八駿升崑崙之墟者後之好事者爲之圖宋齊以下傳之觀其狀甚怪咸若騫若翔若龍鳳麒麟若螳螂然其書猶不經世多有然不足采世聞其駿也因以異形求之則其言聖人者亦類是矣故傳伏羲曰牛首女媧曰其形類蛇孔子如供頭若是者甚眾孟子曰何以異於人哉堯舜與人同耳今夫馬者駕而乘之或一里而汗或十里而汗或數十里百里而不汗者

視之毛物尾鬣四足而蹄齧草飲水一也推是而至於駿一類也
今夫人有不足爲負販者有不足爲吏者有不足爲士大夫者有
足爲者視之圓首橫目食穀而飽肉絺而清裘而燠一也推是而
至於聖亦類也然則伏羲氏女媧氏孔子氏是亦人而已矣驩駟
白羲山子之類若果有之是亦馬而已矣又烏得爲牛爲蛇爲俱
頭爲龍鳳麒麟螳螂然也哉然而世之慕駿者不求之馬而必是
圖之似故終不能有得於駿也慕聖人者不求之人而必若牛若
蛇若俱頭之問故終不能有得於聖人也誠使天下有是圖者舉
而焚之則駿馬與聖人出矣

唐文粹補遺卷第七

而瀛瀛草煇水干也兼以而全靈輝

不風蘇貞頑昔詩不銀真夷香齊不呈氣士大夫治自

以然皆非之圓首辨目貪婪而蝕肉齧而毒莠而黜

而然皆非之圓首辨目貪婪而蝕肉齧而毒莠而黜

而然皆非之圓首辨目貪婪而蝕肉齧而毒莠而黜

而然皆非之圓首辨目貪婪而蝕肉齧而毒莠而黜

而然皆非之圓首辨目貪婪而蝕肉齧而毒莠而黜

而然皆非之圓首辨目貪婪而蝕肉齧而毒莠而黜

而然皆非之圓首辨目貪婪而蝕肉齧而毒莠而黜

而然皆非之圓首辨目貪婪而蝕肉齧而毒莠而黜

而然皆非之圓首辨目貪婪而蝕肉齧而毒莠而黜

而然皆非之圓首辨目貪婪而蝕肉齧而毒莠而黜

而然皆非之圓首辨目貪婪而蝕肉齧而毒莠而黜

而然皆非之圓首辨目貪婪而蝕肉齧而毒莠而黜

而然皆非之圓首辨目貪婪而蝕肉齧而毒莠而黜

而然皆非之圓首辨目貪婪而蝕肉齧而毒莠而黜

唐文粹補遺卷第八目錄

古文一

釋疑

元行冲

秋述

杜甫

絕麟集述

司空圖

武指

劉昫

廣陵散解

韓皋

解江靈

李翱

諭業

皇甫湜

家訓

柳玭

宋時

金業

御王

御王

御王

御王

御王

御王

古文

古文神經意卷第八目錄

唐文粹補遺卷第八

吳江 郭慶 祥伯 纂

英山 金勇 仁甫 校

釋疑

元行冲

客問主人曰小戴之學行之已久康成銓注見列學官傳聞魏公
乃有刊易又承制旨造疏將頒未悉二經孰爲優劣主人答曰小
戴之禮行於漢末馬融注之時所未覩盧植分合二十九篇而爲
說解代不傳習鄭綱子幹師於季長屬黨錮獄起師門道喪康成
於竄伏之中理紛拏之典志存探究靡所咨謀而猶緝述忘疲聞
義能徙具於鄭志向有百科章句之徒曾不窺覽猶遵覆轍頗類
刻舟王肅因之重茲開釋或多改駁仍按本篇又鄭學之徒有孫
炎者雖扶元義乃易前編自後條例支分箴石閒起馬佃增革向
踰百篇葉遵刪修僅全十二魏公病羣言之錯雜紬屨說之精深
經文不同未敢刊正注理睽誤寧不芟龔成畢主聞太宗嘉賞資

縑千匹錄賜儲藩將期頒宣未有疏義聖皇纂業耽古崇儒高曾
規矩宜所修襲乃制昏愚甄分舊義其有注遺往說理變新文務
加搜窮積稔方畢具錄呈進敕付羣儒庶能斟詳以課疏密豈悟
章句之士堅持昔賢特嫌知新欲仍舊貫沉疑多月擯壓不申優
劣短長定於通識手成口答安敢銓量客曰當局稱迷傍觀見審
累朝銓定故是周詳何所爲疑不爲申列答曰是何言歟談豈容
易昔孔安國注壁中書會巫蠱事經籍道息族兄臧與之書曰相
如常忿俗儒淫詞冒義欲撥亂反正而未能果然雅達通博不代
而生浮學守株比肩皆是眾非難正自古而然誠恐此道未申而
以獨智爲議也則知變易章句其難一矣漢有孔季產者專於古
學有孔扶者隨俗浮沈扶謂產云今朝廷皆爲章句內學而君獨
修古義修古義則非章句內學非章句內學則危身之道也獨善
不容於代必將貽患禍乎則知變易章句其難二矣劉歆以通書
屬文待詔官署見左氏傳而大好之後蒙親近欲建斯業哀帝欣

納令其討論各遷延推辭不肯置對劉歆遺書責讓其言甚切諸
博士等皆忿恨之名儒龔勝時爲光祿見歆此議乃乞骸骨司空
師丹因大發怒奏歆改亂前志非毀先朝所立帝曰此廣道術何
爲毀耶由是犯忤大臣懼誅求出爲河南太守宗室不典三河又
徙五原太守以君實之著名好學公仲之深博守道猶追同門朋
黨之議卒令子駿負謗於時則知變易章句其難三矣子雍規元
數十百件守鄭學者時有中郎馬昭上書以爲肅繆詔王學之輩
占咎以聞又遣博士張融案經論詰融等召集分別推處理之是
非具聖證論王肅酬對疲於歲時則知變易章句其難四矣卜商
疑聖納請於曾輿木賜近賢貽嗤於武叔自此之後唯推鄭公王
粲稱伊洛已東淮漢之北一人而已莫不宗焉咸云先儒多闕鄭
氏道備粲竊嗟怪因求其學得尙書注退而思之以盡其意意皆
盡矣所疑之者猶未喻焉凡有兩卷列於其集又王肅改鄭六十
八條張融覈之將定臧否融稱元注泉深廣博兩漢四百餘年未

有偉於元者然二郊之際殊天之祀此元誤也其如皇天祖所自
出之帝亦元慮之失也及服虔釋傳未免差違後代言之思宏聖
意非謂揚己之善掩人之名也何者君子用心願聞其過故仲尼
曰過也人皆見之更也人皆仰之是也而專門之徒恕己及物或
攻先師之誤如聞父母之名將謂亡者之德言而見壓於重壤也
故王邵史論曰魏晉浮華古道夷替洎王肅杜預更開門戶歷載
三百士大夫恥爲章句唯草野生以專經自許不能究覽異義擇
從其善徒欲父康成兄子慎寧道孔聖誤諱聞鄭服非然於鄭服
甚憤憤鄭服之外皆讎也則知變易章句其難五矣伏以安國尙
書劉歆左傳悉遭擯於曩葉見重於來今故知二人之鑒高於漢
廷遠矣孔季產云物極則變比及百年外當有明直君子恨不與
吾同代者於戲道之行廢必有其時者歟僕非專經罕習章句高
明不著易受輕誣頃者修撰殆淹年月賴諸賢輩能左右之免致
愆尤仍叨賞賚內省昏朽其榮已多何遽持一己之區區抗羣情

之嚙嗜捨勿矜之美成自我之私觸近名之誠興犯眾之禍一舉
四失中材不爲是用韜聲甘此沈默也

秋述

杜甫

秋杜子臥病長安旅次多雨生魚青苔及榻常時車馬之客舊雨
來今雨不來昔襄陽龐德公至老不入州府而楊子雲草元寂寞
多爲後輩所褻近似之矣嗚呼冠冕之窟名利卒卒雖朱門之塗
泥土子不見其泥矧抱疾窮巷之多泥乎子魏子獨踽踽然來汗
漫其僕夫夫又不假蓋不見我病色適與我神會我棄物也四十
無位子不以官遇我知我處順故也子挺生者也無矜色無邪氣
必見用則風后力牧是已於文章則子夏子游是已無邪氣故也
得正始故也噫所不至於道者時或賦詩如曹劉談話及衛霍豈
少年壯志未息俊邁之機乎子魏子今年以進士調選名隸東天
官告余將行旣縫裳旣聚糧東人怵惕筆札無敵謙謙君子若不
得己知祿仕此始吾黨惡乎無述而止

絕麟集述

司空圖

駕在石門年秋八月愚自關畿竄浙上所著詩累年首題於屋壁且人前集壬戌春復自擅山至此目敗疔作火土二曜叶力攻凌可知矣冒沒已多幸無大愧固非賚恨而有作也尙慮道魁釋曾見之慊然於我者蓋自此集雜言實病於負氣亦猶小星將墜則芒砀驟作且有聲曳其後而可駭者撐霆裂月挾之而其肆其憤固不能自戢耳今之云云況恃白首無復顧籍然後知賢英能各出肺肝以示千載亦當不免斯累遽咄咄耶知非子述

武指

劉 貺

自昔議邊者推高於嚴尤班固嚴尤議曰御匈奴自古無得上策云云貺以爲嚴尤之議辨而未詳班固之論詳而未盡推而爲言周得上策秦得其中漢無策焉何以言之荒服之外聲教所不逮其叛也不爲之勞師其降也不爲之釋備嚴其守禦險其走集犯塞則有執訊之捷深入則有殪戎之勳俾其欲爲寇而不能願臣

妾而未得斯御戎之上策禁暴之良算惠此中夏以綏四方周人之道也况故曰周得上策易稱王侯設險以固其國築長城修障塞易之設險也今朔塞之上多古長城未知起自何代七國分爭國有長城趙簡子起長城以備胡燕秦亦築長城以限中外則長城之作其來遠矣秦兼天下益理城塹城全國滅人歸咎焉自漢至隋因其成業或修或築何代無之後魏時築長城議曰虜騎輕捷風來電往塢壁未遑閉牛羊不暇收雷擊至於近郊雲飛出於塞表不得不立長城以閉之人築一步千里之城役三十萬人不有旬朔之勞安獲久長之逸始皇斥中國之戍出諸塞表匈奴不敢南下而牧馬戰士不敢彎弓而報怨况故曰秦得中策史稱劉敬說高祖以魯元公主嫁匈奴嗣王則漢之外孫豈敢與大父爭哉假立宗女匈奴不信無益也帝欲遣魯元后泣諫曰帝惟一女奈何棄之匈奴乎由是遣宗女行又按魯元公主則趙王張敖之后也人告王反呂后言趙王以公主故不宜有此高祖曰使張敖

有天下豈少乃女乎高祖審魯元公主不能止趙王之謀而謂能
息匈奴之叛耶假有欲遣之辭固戲言耳且冒頓手刃頭曼躬射
其母而冀其不與外祖爭強豈不惑哉然則高祖知和親不能久
安而爲之者以天下初定苟舒歲月之禍以息兆人之勤爾而天
姿豁達不矜智能沈謀內斷人莫之識武帝時中國康寧胡寇益
鮮疏而絕之此其時也方更糜耗華夏連兵積年嚴尤以爲下策
可矣漢之失策非止用兵至於昭宣武士練習斥堠精審胡人則
覆亡居則畏逼收跡遠徙窮竄海陰朝廷不遵宗周之故事乃襲
奉春之過舉啟寵納侮傾竭府藏給西北方無慮歲二億七十萬
賞賜之費傳送之勞尙不計焉皇室淑女賓於穹廬掖庭良人降
於沙漠夫貢子女方物臣僕之職也詩曰莫敢不來享莫敢不來
王傳稱荒服者來王此皆稱其來不言當往也杞用夷禮經貶其
爵公及吳盟諱而不書奈何以天子之尊與匈奴約爲兄弟帝女
之號與胡媼並爲戎妻烝母報子從其污俗中國之異於蠻夷者

以有父子男女之別也若乃位配天地職調陰陽不能革龔昧之性使漸習華風反令婉冶之姿毀節異類其爲垢辱可勝道哉漢之君臣常莫之恥東漢至曹馬招來羌狄內之塞垣資奉所費有踰於昔百人之酋千口之長金印紫綬食王侯之俸者相半於朝牧馬之童乘羊之隸齋糞毘之資邀綾紈之利者相錯於路九州五服耒耨之所利絲枲之所生方三千里植於三千里之中散於數萬里之外人焉得不勞國焉得不貧故夷狄歲驕華夏日蹙當其強也又竭人力以征之及其服也又如是以養之病則受養強則內攻嗚呼爲羌胡服役且千載而莫之恤可不大悲哉爲政者誠能移其財以賞戍卒則吾人富矣移其爵以餌守臣則我將良矣富利歸於我危亡移於彼無納女之辱無傳送之勞此之不爲而棄同卽異與頑用豎以夷亂華以裔謀夏變上國之風俗汨中和之正氣貺故曰漢無策焉嚴尤以古無上策焉者爲不能臣妾也聖王誠能之而不用爾秦氏無策者謂其攘夷狄而亡國也秦

亡之咎非攘夷也稱漢代得下策者謂伐胡而人病人既病矣又役人而奉之是無策也貶故曰嚴尤之議辨而未詳者也班固之論頗究其情而曰其來慕義接以禮讓使曲在彼是未盡也何者禮讓以交君子不以接小人況於禽獸夷狄乎夫奇貨內來則華夏之情蕩纖麗外散則戎羯之心生華夏情蕩出兵之源也戎羯心生侵盜之本也聖人唯此之慎不貴奇貨不寶遠物禽獸非其土性不育器服非其所產不御豈惟贄幣不通哉至飲食聲樂不與其之故夷狄來朝坐之門外使舌人體委以食之若禽獸然不使知馨香佳味也獲其聲不列於庭廟受其貢不過糶矢獸皮不爲贄幣不爲財貨利旣小矣酬亦宜然漢氏旣習玩驕虜使悅燕趙之名倡雅質甘太官之八珍六齊使五都之文綺羅紈供之則長欲而增求絕之則滅德而招怨加以斥堠不明士卒不習是由飽豺狼以良肉而縱其獵噬疲人求其禍源接以禮讓之所致也故通貢獻則去錦繡而得毛革討負約則獲犬馬而喪士人許和

親則毀禮義而順戎俗張騫使西域得摩訶兜勒曲漢武採之以爲鼓吹東漢魏晉樂則胡笛箏篋御則胡床食則貊炙器則蠻盤祠則胡天晉末五胡遞居中夏豈無天道亦人事使之然也華人步卒也利險阻虜人騎兵也利平地彼則馳突我則堅守無與追奔無與競逐來則杜險使無進去則閉險使無還衝以長戟臨以強弩非求勝之也創之而已措彼頑凶寘之度外警諸蟲豸方乎虺蜴如是何禮讓之接何曲直之爭哉貺故曰班固之論詳而未盡者此也

廣陵散解

韓 皋

妙哉嵇生之爲是曲也其當晉魏之際乎其音商主秋聲秋也者天將搖落肅殺其歲之晏乎又晉成金運商金聲也所以知魏云季而晉將代也慢其商弦而與宮同音是臣奪君之義也此所以知司馬氏將篡也司馬懿受魏明帝顧託後嗣反有篡奪之心自誅曹爽逆節彌露王陵都督揚州謀立荆王彪母邱儉文欽諸葛

誕前後相繼爲揚州都督咸有匡復魏室之謀皆爲懿父子所殺
叔夜以揚州故廣陵之地彼四人者皆魏室文武大臣咸敗散於
廣陵故名其曲爲廣陵散言魏氏散自廣陵始也止息者晉雖暴
興終止息於此也其哀憤蹙蹙痛迫脅之旨盡在於是矣永嘉
之亂其應乎叔夜撰此將貽後代之知音者且避晉魏之禍所以
託之神鬼也

解江靈

李翱

元和六年八月余自京還東暮宿在江濤水旣平月高極明萬物
潛休遠無微聲坐久夜靜目亦將瞑聞江中有如賈人相與言曰
與子商遊十有餘年不識我愚託我如親相得之歡百賈誰如泰
山後召子欲代予力雖不能志願如初自昔及茲未嘗汝薄利必
以告害斯其度誓當結固永守終樂汝之責人慘若五刑小不順
汝亦何足聽汝心好惡灼若天心動比孔某其神且明異汝者斥
諂汝者榮苟不汝隨絕如詛盟人實難知堯所未易我雖受責敢

喪前志利汝薦汝每憂不暨終何能成惟力所至豈不汝怨我道
無二曰子虛言鬼神來棄汝實異茲翻然汝作瘡痍生心洗刮不
落巧蔽我長善探我惡短我如墜譽我如縛人或美我汝閃其目
人或毀我汝盈其欲充汝之心飽汝之腹雖汝子孫亦所不足我
實蒙頑爲汝之辱動多尤悔羸敗不畜汝旣富厚享天百福筋骨
堅強婢妾約綽財貨積委屋室豐渥我從此去非曰道薄願汝我
忘無盛其毒言未訖余叱之曰人生若流其可久長須臾臭死瞥
若電光用心平虛天靈所臧得失是非其細如芒奚爲交爭此實
不祥相歡不足其氣已僵汝行吾言可以息兵於是言者歎息吐
氣掩鬱無語啟戶視之不見其處

諭業

皇甫湜

逍遙遊曰適百里者宿春糧適千里者必聚糧此言務遠則積彌
厚成安君曰千里饋糧士有饑色樵蘇後爨師不宿飽此言持不
實則危一則寓論一則武經相發明其義符也故彊於內者外必

勝殖不固者發不堅功不什倍不可以果志力不兼兩不可以角
敵號猿貫蝨徹札飲羽必非一歲之決拾仰馬出魚理心順氣必
非容易之搏拊淺闕庸種無嘉苗頽絢疏織無良帛夫欲利其獲
不若優其爲獲之方若欲顯其能不若營其爲顯之道求諸人不
若求諸己馳其華不若馳其實彼則趨趨於卿士之門我則婆娑
於聖賢之域彼則巾車於名利之肆我則冠屨於文史之園道寢
而後進業成而後索以其勞於彼曷若勤於此以其背於路曷若
齋於家求售者聲門而銜賈致賤者深匱而俟價求聘者自容於
覲粧取賄者嫌局於密影鮪可薦也不慮綸罟之不逢橋可貢也
不慮包匭之不入務出人之名安得不厲出人之器戰橫行之陣
安得不振橫行之略書不干軸不可以語化文不百代不可以語
變體無常軌言無常宗物無常用景無常取在譚其理覈其微賦
物而窮其致壽詠者極性情之本載述者遵良直之旨觸類而長
不失其要此大略也夫比文之流其來尙矣自六經子史至於近

代之作無不詳備當朝之作則燕公悉以評之自燕公已降試爲
子論之燕公之文如硬木柶枝締構大厦上棟下宇孕育氣象可
以變陰陽而閱寒暑坐天子而朝羣后許公之文如應鐘鼗鼓笙
簧鏗磬崇牙樹羽考以宮縣可以奉明神享宗廟李北海之文如
赤羽白甲延互平野如雲如風有驅有虎闐然鼓之吁可畏也賈
常侍之文如高冠華簪曳裾鳴玉立於廊廟非法不言可以望爲
羽儀資以道義李員外之文則如金擣玉輦雕龍彩鳳外雖丹青
可掬內亦體骨不饑獨孤尙書之文如危峰絕壁穿倚霄漢長松
怪石傾倒谿壑然而略無和暢雅德者避之楊崖州之文如長橋
新構鐵騎夜渡雄震威厲動心駭耳然而鼓作多容君子所慎權
文公之文如朱門大第而氣勢宏敞廊廡廩廩戶牖悉周然而不
能有新規勝槩令人竦觀韓吏部之文如長江秋注千里一道衝
颺激浪瀚流不滯然而施諸灌溉或爽於用李襄陽之文如燕市
夜鴻華亭曉鶴嘹唳亦足驚聽然而才力偕鮮悠然高遠故友沈

諫議之文則如隼擊鷹揚滅沒空碧崇蘭繁榮曜英揚蕤雖迅舉
秀擢而能沛艾絕景其他握珠璣奪組繡者不可一二而紀矣若
數公者或傳符於帝宰或受命於神工或鳳翥詞林或虎踞文苑
或抗轡荀孟或攘袂班揚皆一時之豪彥筆硯之麟鳳今皆游泳
其波瀾偃息其林藪銓其一揖之舊也而驟以諭業之言動子之
志誠未當也遂絕意隨計解裝退修循力行待取之儒規達先難
後獲之通理將爲勇退真勇進也斯可尙矣子旣信余之不欺余
亦貴子之不忽因源流遵業而列論焉

家訓

柳 玘

夫門第高者可畏不可恃可畏者立身行己一事有墜先訓則罪
大於他人雖生可以苟取名位死何以見祖先於地下不可恃者
門高則自驕族盛則人之所嫉實蕤懿行人未必信纖瑕微累十
手爭指矣所以承世胄者修己不得不懇爲學不得不堅夫人生
世以己無能而望他人用以己無善而望他人愛無狀則曰我不

遇時時不急賢亦由農夫鹵莽種之而怨天澤之不潤雖欲弗餒
其可得乎予幼聞先訓講論家法立身以孝弟爲基以恭默爲本
以畏怯爲務以勤儉爲法以交結爲末事以棄義爲凶人肥家以
忍順保友以簡敬百行備疑身之未周三緘密慮言之或失廣記
如不及求名如儻來去恠與驕庶幾減過莅官則潔己省事而後
可以言守法守法而後言養人直不近禍廉不沾名廩祿雖微不
可易黎甿之膏血榷楚雖用不可恣褊狹之胸襟憂與福不偕潔
與富不並比見家門子孫其先正直當官耿介特立不畏強禦及
其衰也唯好犯上更無他能如其先遜順處己和柔保身以遠悔
尤及其衰也但有暗劣莫知所宗此際幾微非賢不達夫壞名蓄
己辱先喪家其失尤大者五宜深志之其一自求安逸靡甘淡泊
苟利於己不恤人言其二不知儒術不悅古道憎前經而不恥論
當世而解頤身旣寡知惡人有學其並勝己者厭之佞己者悅之
唯樂戲談莫思古道聞人之善嫉之聞人之惡揚之浸漬頗僻銷

刑德義簪裾徒在廝養何殊其四崇好慢遊耽嗜麴藥以銜盃爲
高致以勤事爲俗流習之易荒覺已難悔其五急於名宦暱近權
要一資半級雖或得之眾怒羣猜鮮有存者茲五不臆甚於瘞疽
瘞疽則砭石可瘳五失則巫醫莫及前賢炯誠方冊具存近代覆
車聞見相接夫中人以下修辭力學者則躁進患失思展其用審
命知退者則業荒文蕪一不足採唯上智則研其慮博其聞堅其
習精其業用之則行舍之則藏苟異於斯豈爲君子

唐文粹補遺卷第九目錄

古文二

寄言上篇 韋端符

寄言下篇 前人

學解嘲對 沈亞之

紀鴉鳴 林籟言

寓居對 孫樵

罵僮志 前人

悲摯獸 皮日休

記稻鼠 陸龜蒙

記錦裙 前人

招野龍對 前人

題神羊圖 羅隱

本農 前人

丹商非不肖

前人

婦人之仁

前人

寄言山嶽

率崇裕

寄言不測

前人

寄言博學

亞文

寄言不測

前人

寄言不測

前人

寄言不測

前人

寄言不測

前人

寄言不測

前人

寄言不測

前人

寄言不測

前人

寄言不測

前人

寄言不測

前人

古文不測

唐文粹補遺卷第九

吳江 郭麐 祥伯 纂

英山 金勇 仁甫 校

寄言上篇

韋端符

孺子道成人之言父母必憐誇焉非直父母也鄉人亦異而指之矣是何也非所以期孺子也待以孺子而言成人也則父母憐之如鄉人指異卽有魁然成人而事孺子是何人哉其所以待之視之用何心哉移是而言小人不能爲君子固也陷乎罪誅非暴逆狼戾而窘於咽喉之空尺寸之膚受之不仁仁人不憫憐之也今有一鄉之吏遇孺子把弄土塗折挽草木則呵而批之曰何爾也成人者有妄毀淫取顧不敢動睫而過之是誠不了一鄉矣吾欲世之大人無獨見鄉吏之不了一鄉而不自見所不理無喝怒於孺子之爲而恬視魁然成人挽折大草淫取大物者本其所以待之之心從而校之天下幾蘇息

寄言下篇

韋端符

今有人負病於此則其親戚者憂之聞善醫則不遠燕越而求之欲其病之速瘳若噓毛掇葉之易是直智無所施耳然則憂者雖甚不能爲也善爲者又非所憂也不憂非薄人也非其地耳彼誠善醫也安得人人而憂之必居其地而恥不能則將悉其技而爲之與憂者之心不異故病甚憂戚之得善爲之醫則幾乎平理矣不得善醫者百十旦夜坐環之而藥謀無所曉其去死喪幾何故曰憂不能爲技不習也爲者不必憂非其地也必得善爲之者處憂之之地然後知病之間也不日矣昔之爲天下國家而病者豈無善之者耶不得處憂之之地耳漆室女誠憂矣不能爲魯也鴟夷子嘗工爲越矣陶朱公則視猶涉者之視車使常得善爲天下國家者處憂之之地何敗亡之有

學解嘲對

沈亞之

客有以今廩食之不充漕輓不勝於弊是勞遠而墮近以爲問者

予於是發憤數日故縷言而對曰昔漢徙山東豪富兼并之家以奉園邑凡百二十四萬戶又有南北東西軍及匈奴雜虜以國眾來歸者仰給於漢未聞常俟輓於吳越而後給也今以三千人食勞輸江淮歲貢三十萬斛迎流越險覆舫敗輒不得十半自涓以東督稽之官凡四十九署署吏不下百數歲費錢十千萬爲大數而部吏舟傭相踰爲姦鞭榜流血酸苦之聲相聞禁錮連歲不解歲千餘人雖赦宥而獄死者不可勝多矣甚非仁聖之所以牧人也乃者燕人叛元宗南巡巴蜀肅宗勞兵於靈武及二駕神遊代宗臨陝關中流離羸牛一韁常市錢二百千故有轉輸之法雖救一時然終轉入人於禍誠可以痛今雖未可暴去且宜以三輔粟爲貢重資於農則耕稼自勤耕稼自勤旬服無曠土遊人矣如此九年之蓄可以儲又何勞輸輓於遠哉客曰敬聞其旨

紀鴉鳴

林簡言

東渭橋有賈食於道者其舍之庭有槐焉聳幹舒柯布葉凝翠若

不與他槐等其舍既陋主人獨以槐爲飾當乎夏日則孕風貯涼雖高臺大屋諒無慚德是以徂南走北步者乘者息肩於斯稅駕於斯亦忘舍之陋長慶元年簡言去鄜得息其下觀主人德槐之意亦高臺大屋者也洎二年去夏陽則槐薪矣屋既漏槐且爲薪遂進他舍因問其故曰某與鄰俱賈食者也某以槐故利兼於鄰鄰有善作鴉鳴者每伺宵晦輒登樹鴉鳴凡側於樹若小若大莫不慄然懼悚以爲鬼物之在槐也不日而至也又私於巫者俾於鬼語槐不去鴉不息士人有母者且瘵慮禍及母遂取巫者語後亦以稀賓致困簡言曰假爲鴉鳴滅樹殃家甚於眞鴉非聽之誤耶然屈平謇諤非不利於楚也靳尙一鴉鳴而三閭放楊震訐謨非不利於漢也樊豐一鴉鳴而太尉死求之於古主人亦不爲甚愚

寓居對

孫樵

長安寓居闔戶諷書悴如凍灰癯如槁柴志枯氣索怳怳不樂一

且有曾識面者排戶入室咤駭唧唧且曰憊耶餓耶何自殘耶則對曰樵天付窮骨宜安守拙無何提筆入貢士列抉文倒魄讀書爛舌十試澤宮十黜有司知已日懈朋徒分離矧遠來關東橐裝銷空一入長安十年屢窮長日猛赤餓腸火迫滿眼花黑晡西方食暮雪嚴冽入夜斷骨穴衾敗褐到曉方活古人取文其責蓋輕一篇跳出至死馳名今人取文章章貴奇一句戾意全卷鮮知言念每歲徂春背暑洗剔精魂澄拓襟慮曉窗夜燭上下雕斲據言必高儲思必深字字磨校以牢知音況榮辱撓其外得失戕其內機穽在乎足鋒刃在乎背吾非檻豕籠雛其能窮而反諛乎客退遂書几作歌曰肥於貌孰與肥其道求於人孰與求其身處乎出乎孰爲得而孰爲失乎

罵僮志

孫樵

孫樵既黜於有司忽恍乎若病醒之未醒茫茫若癡人之瞑行據牀隱几憊然不寐二僮以樵尙甘於眠偶語戶間且曰吾聞他舉

進士者有門吏諸生爲之前焉有親戚知舊爲之地焉走健僕囊
大軸肥馬四馳門門求知所至之家入去如歸闔者迎屈引主人
出取卷開讀喜懼入骨自某至某如到一戶口口附和不敢指破
親朋扳聯聲光爛然其於名達進取如掇今主遠來關東居長安
中進無所歸居無所依忿割口食以就卷軸冒暑觸雪攜出籍謁
所至之門當關迎嗔俯眉與語受卷而去望一字到主人目且不
可得矧其開口以延乎時或不棄而遇主人推心於公是者當開
緘引讀苟合心曲又曰彼何人耶彼何自耶況所爲幽拙大與時
闊凡爲世人婉顏巧脣望風趨塵以售其身則必淡面鈍口慙揖
癡步昧於知幾買嫌於時凡爲讀書東獵西漁粗知首尾則爲有
餘則必燈前月下寒朝暑夜磨礪反覆期入聖域徒苦其神孰裨
其心凡爲文章拈新摘芳鼓勢求知取媚一時則必擺落尖新时期
到古人上規時政下達民病句句淡澀讀不可入徒乖於眾孰適
於用凡爲造謁去冷附熱大求其力小求其得則必權門掃迹寂

冥是適所至之處雀羅在戶人皆嫌去愈恭好慕凡爲結交搜羅
傑豪相醉以酒相飮以庖則必屑去溫煥膠牢淡泊時或叢處凍
冷徹曙晨起散去潔腹出戶迨暮如故學獵古今不爲眾譽文近
于奇不爲人知九試澤宮九黜有司十年輦下與窮爲期一歲之
間幾日晨炊饑不飽菜寒無襲衣此皆自取何怨於時浪死無成
孰與歸耕言始及是樵聞起喜二僮遠匿呼論不得遂敲几而歌
曰彼以其勢我專吾勤彼以其力我勤吾學學之不修骨肉如仇
學之苟修四海何訾噫吾之所貴僮之所薄吾之所惡僮之所樂
僮何知吾豈獨無時

悲摯獸

皮日休

匯澤之場農夫持弓矢行其稼穡之側有茗頃爲農夫息其旁未
久茗花紛然不吹而飛若有物嫉視之虎也跳踉哮囁視其狀若
有所獲負不勝其喜之態也農夫謂虎見已將遇食而喜者乃挺
矢匿形伺其重嫉發貫其腋雷然而踣及視之枕死麕而斃矣意

者謂獲其麴將食而嫉將嫉而害日休曰噫古之士獲一名受一位如已不足於名位而已豈有喜於富貴嫉於權勢哉然反是者獲一名不勝其驕也受一位不勝其傲也驕傲未足於心而刑禍已滅其屬其不勝任與夫獲死麴者幾希悲夫吾以名位爲死麴以刑禍爲農夫庶乎免於今世矣

記稻鼠

陸龜蒙

乾符已亥歲震澤之東曰吳興自三月不雨至於七月當時汙塢沮洳埃塏塵敦擢檝支派者入扉屨無所汙農民轉遠流漸稻本晝夜如乳赤子欠欠然救渴不暇僅得飽坼穗結十無一二焉無何羣鼠夜出嚙而僵之信宿食殆盡雖廬守版擊毆而駭之不能勝若官督戶責不食者有刑當是而賦索愈急棘束械榜箠木肌頸者無壯老吾聞之於禮曰迎貓爲食田鼠也是禮闕而不行久矣田鼠知之後歟物有時而暴歟政有貪而廢歟國語曰吳稻蟹不遺種豈吳之上鼠與蟹更伺其事而效其力殲其民歟且魏風

以碩鼠刺重歛碩鼠斥其君也有鼠之名無鼠之實詩人猶曰逝將去汝適彼樂土況乎上招其財下啗其食率一民而當二鼠不流浪轉徙聚而爲盜何哉春秋蟲蝻生大有年皆書是聖人於豐凶不隱之驗也余學春秋又親蒙其災於是乎記

記錦裙

陸龜蒙

侍御史趙郡李君好事之士也因余話上元瓦官寺有陳後主羊車一輪天后武氏羅裙佛幡皆組繡奇妙李君乃出古錦裙一幅示余長四尺下廣上狹下闊六寸上減下三寸半皆周尺如直其前則左有鶴二十勢若飛起率曲折一脛口中含葶藶背右有鸚鵡聳肩舒尾數與鶴相等二禽大小不類而隔以花卉均布無餘地界道四向五色閒雜道上累細鈿點綴其中微雲瓊結互以相帶有若駁霞殘虹流烟墮霧春草夾徑遠山截空壞牆古苔石泓秋水印丹浸漏粉蝶塗染盤纒環佩雲隱涯岸濃澹霏拂靄抑冥密始如不可辨別及諦視之條段斬絕分畫一一有去處非繡非

繪纈緻柔美又不可狀也裏用繪綵下製綫尙如舊兩旁皆解散
蓋拆滅零落僅存此故耳縱非齊梁物亦不下三百年矣昔時之
王如此妙也曳其裙者復何人焉因筆之爲辭繼於錦譜之後俾
善詩者賦之

招野龍對

陸龜蒙

昔叅龍氏求龍之嗜欲幸而中焉得二龍而飲食之龍之於人固
異類以其若已之性也故席其宮沼百川四溟之不足游甘其飲
食洪流大鯨之不足味施施然擾擾然其愛弗去一旦值野龍奮
然而招之曰爾奚爲者茫茫乎天地之間寒而蟄陽而升能無勞
乎誠能從吾居而晏乎野龍矯首而笑之曰若何齷齪乎如是耶
賦吾之形冠角而被鱗賦吾之德泉潛而天飛賦吾之靈噓雲而
乘風賦吾之職抑驕而澤枯觀乎無極之外息乎大荒之墟窮端
倪而盡變化其樂不至耶今爾苟容於蹄涔之間惟泥沙之是拘
惟蛭螻之與徒牽乎嗜好以希飲食之餘是同吾之形異吾之樂

者也狎於人啗其利者扼其喉截其肉可以立待吾方哀而援之以手又何誘吾納之陷穽耶爾不免矣野龍行未幾果爲夏后氏之醢

題神羊圖

羅隱

堯之庭有神羊以觸不正者後人圖形像必使頭角怪異以表神聖物噫堯之羊亦猶今之羊也但以上世淳樸未去故雖人與獸皆得相指令及淳樸銷壞則羊有貪狠性人有割割心有貪狠性則崇軒大厦不能駐其足矣有割割之心則雖邪與佞不能舉其角矣是以堯之羊亦猶今之羊也貪狠搖其正性刀匕制其初心故不能觸阿諛矣

本農

羅隱

有覆於上者如天載於下者如地而百姓不之知有恩信及一物教化及一夫民則歸之其猶旱歲與豐年也豐年之民不知甘雨柔風之力不知生育長養之仁而曰我耕作以時倉廩以實旱歲

之民則野枯苗縮然後決川以灌之是一川之仁深於四時也明矣所以鄭國哭子產三月而魯人不敬仲尼

丹商非不肖

羅隱

理天下者必曰陶唐氏必曰有虞氏嗣天下者必曰無若丹朱無若商均是唐虞爲聖君丹商爲不肖矣天下知丹商之不肖而不知丹商之爲不肖不在於丹商也不知陶虞用丹商於不肖也夫陶虞之理大無不周幽無不照遠無不被苟不能肖其子而天下可以肖乎自家而國者又如是不乎蓋陶虞欲推大器於公共故先以不肖之名廢之然後俾家不自我而家而子不自我而子不在丹商之肖與不肖矣不欲丹商之蒙不肖之名於後也其肖也我旣廢之矣其不肖也不凌逼於人是陶虞之心示後代以公其仲尼不泄其旨者將以正陶虞之教耳而猶湯放桀武王伐紂焉

婦人之仁

羅隱

漢祖得天下而良平之功不少焉吾觀留侯破家以讐韓曲逆束

身以歸漢則有爲之用先見之明又何以加焉史遷則曰張良若
女子而陳平美好是皆婦人之仁也外柔而內狡氣陰而志忍非
狡與忍則無以成大名無他柔弱之理然也嗚呼用其似婦人女
子者猶若是況真用婦人之言哉不得不畏

唐文粹補遺卷第九

其言始不謂不具

其言始不謂不具

其言始不謂不具

其言始不謂不具

唐文粹補遺卷第十目錄

碑

段干木廟記盧士牟

九成宮醴泉碑銘

魏徵

唐陳州龍興寺碑

張說

平淮西碑

韓愈

寶建德碑

殷侗

唐梓州慧義精舍南禪院四證堂碑銘

并序
李商隱

梓州道興觀碑銘

前人

蘇州...

...

...

...

...

...

...

...

...

唐文粹補遺卷第十

吳江 郭麐 祥伯 纂

英山 金勇 仁甫 校

段干木廟記

盧士牟

陝之芮東有祠著於道曰魏文侯師段干木廟謹按史傳語文侯過其廬必式呂覽云秦攻芮司馬康以先生深諫其君又按圖經云先生以原上草廬中高枕而臥秦遂解兵昔子貢救魯挾辯詐扶危主然後僅而獲免豈若先生靡勞師徒曠然晏息而國不加害民受其賜誠以德充氣融道義純備者矣貞觀元年秋八月七日將仕郎前守河南府伊陽縣主簿范陽盧士牟載想遐踪願誌遺廟銘曰

鼎河在南中條在北洪河橫流以紀魏國天地淑靈山澤粹精惟公克生爲魏之楨鄰不加兵民用舒寧秦號虎狼役厲重傷毒螫斷斷侵軼西疆瞻我仁人沛然知方以義以暴以柔以剛善師不

陣古稱至德先生晏然婆娑偃息蓬居草廬是敬是式比彼干戈
俄成禮則士之生世人爵爲貴功成不居惟德之懿士之避土或
蹈遐裔公則靖民以義爲利我行其野祠宇歸然播詠仁風精誠
若傳條山如礪河水如帶先生之德永永不昧

九成宮醴泉碑銘

魏徵

維貞觀六年孟夏之月皇帝避暑於九成之宮此則隋之仁壽宮
也冠山抗殿絕壑爲池跨水架楹分巖竦闕高閣周建長廊四起
棟宇膠葛臺榭參差仰視則逴逴百尋下臨則崢嶸千仞珠璧交
映金碧相輝照灼雲霞蔽虧日月觀其移山迴澗窮泰極侈以人
從欲良足深尤至於炎景流金無鬱蒸之氣微風徐動有淒清之
涼信安體之佳所誠養神之勝地漢之甘泉不能尙也皇帝爰在
弱冠經營四方逮乎立年撫臨億兆始以武功一海內終以文德
懷遠人東越青邱南踰丹徼皆獻琛奉贄重譯來王西暨輪臺北
拒元闕並地列州縣人充編戶氣淑年和邇安遠肅羣生成遂靈

貺畢臻雖藉二儀之功終資一人之慮遺身利物櫛風沐雨百姓
爲心憂勞成疾同堯肌之如腊甚禹足之胼胝針石屢加膝理猶
滯爰居京室每弊炎暑羣下請建離宮庶可怡神養性聖上愛一
夫之力惜十家之產深閑固拒未肯俯從以爲隋氏舊宮營於曩
代棄之則可惜毀之則重勞事貴因循何必改作於是斷彫爲樸
損之又損去其太甚葺其頽壞雜丹墀以砂礫間粉壁以塗泥玉
砌接於土階茅茨續於瓊室仰觀壯麗可作鑒於既往俯察卑儉
足垂訓於後昆此所謂至人無爲大聖不作彼竭其力我享其功
者也然昔之池沼咸引谷澗宮城之內本乏水源求而無之在乎
一物旣非人力所致聖心懷之不忘粵以四月甲申朔旬有六日
己亥上及中宮歷覽臺觀閒步西城之陰躊躇高閣之下俯察厥
土微覺有潤因而以杖導之有泉隨而湧出乃承以石檻引爲一
渠其清若鏡味甘如醴南注丹霄之右東流度於雙闕貫穿青瑣
縈帶紫房激揚清波滌蕩瑕穢可以導養正性可以澂瑩心神鑒

映羣形潤生萬物同湛恩之不竭將元澤之常流匪惟乾象之精
蓋亦坤靈之寶謹按禮緯云王者刑殺當罪賞錫當功得禮之宜
則醴泉出於闕庭鵠冠子曰聖人之德上及太清下及太寧中及
萬靈則醴泉出瑞應圖曰王者純和飲食不貢獻則醴泉出飲之
令人壽東觀漢紀曰光武中元元年醴泉出於京師飲之者痼疾
皆愈然則神物之來實扶明聖既可蠲茲沈痼又將延彼遐齡是
以百辟卿士相趨動色我后固懷挹推而弗有雖休勿休不徒
聞於往昔以祥爲懼實取驗於當今斯乃上帝元符天子令德豈
臣之末學所能不顯但職在記言屬茲書事不可使國之盛美有
遺典策敢陳實錄爰勒斯銘其詞曰
惟皇撫運奄壹寰宇千載應期萬物斯覩功高大舜勤深伯禹絕
後光前登三邁五握機蹈矩乃聖乃神武克禍亂文懷遠人書契
未紀開闢不臣冠冕並襲琛贄咸陳大道無名上德不德元功潛
運幾深莫測鑿井而飲耕田而食靡謝天功安知帝力上天之載

無臭無聲萬類資始品物流形隨感變質應德效靈介焉如響赫
赫明明雜遝景福葳蕤繁祉雲氏龍官龜圖鳳紀日含五色烏呈
三趾頌不輟工筆無停史上善降祥上智斯悅流謙潤下潺湲皎
潔萍旨醴甘冰凝鏡澈用之日新挹之無竭道隨時泰慶與泉流
我后夕惕雖休勿休居崇茅宇樂不般遊黃屋非貴天下爲憂人
玩其華我取其實還酒反本代文以質居高思墜持滿戒溢念茲
在茲永保貞吉

唐陳州龍興寺碑

張說

觀夫廣大無相者虛空也四輪倚之而住精微無體者佛性也萬
法因之以生聖人有以見三界成壞皆有爲殼故剖之以戒觜聖
人有以見六趣輪迴是無明網故決之以定刃爍寶光之慧炬沛
善利之慈舟返迷路率於中道倚橫流登於彼岸以言乎真實之
要總攝一乘以言乎天地之間曲成萬物大矣哉道心包舉等太
虛而無際法教流通彌曠劫而常在則有乘如來方便出應化門

用大士因緣處帝王位俾庶類咸若謂之光宅天下令眾生修善
名爲莊嚴佛國龍興寺者皇帝卽位之歲溥天之所置也唐祚中
微周德更盛歷載十六姦臣擅命伯明氏有盜國之心一闡提有
害聖之跡皇上操北斗起東朝排閭闔運扶搖張目而叱之殷乎
若震雷發地歛號翁響以克彼二凶赫然若太陽昇天晞熙仰象
以復我萬邦返元后傳國之璽受光武登壇之玉尊祖繼宗郊天
祀地之理旣洎修書布新改物班瑞之典又備乃考出世之法鼓
大雄之事入無功用之品住不思議之力一光所燭庶兆爲之清
涼一音所宣大千爲之震動雲蒸風靡不崇朝而壞衣涌埳徧天
下矣陳州者上古太皞之虛近代淮陽之地置守則列爲郡封王
則建爲國本其風俗豪侈靡麗舊矣翻東門之下接袂成帷觴宛
邱之上衽服成市信豫州之郊一都會也刺史南陽韓府君名琦
其爲邦也勝殘去殺聖主之得賢臣別駕彭城郡王名隆業其從
政也能肅而恭高陽之有才子長史南陽張齊賢儒林之選也司

馬河南雲盈公族之良也士曹從事八人錄事參軍于璆爲稱首
六屬官人二十五人宛邱縣令崔修已爲稱首或以藝榮或以門
進高車一轍美利向人禮舉刑清於是乎在因邦甸積稔之蓄偶
日月再旦之初欽若王言建立靈寺上略其趾下務其終百工不
勸而亟庶役不徵而會經始如雲成之不日夫其帶四郭五衢之
陌踞重墉闌闔之端福地砥平長垣雲矗高門有閎大厦斯飛連
廊曲閣交軒對雷木磨而不雕土塗而不飾壯無僭侈以約費爲
功儉無偪陋以靜居爲寶法王宮殿近寶花之城菩薩伽藍住金
燈之地亦猶是也上座處元寺真度維那守慎等戒珠如月獨潔
麒麟之行法寶如山普聞獅子之吼克諧善眾底定神居甘露飽
而滿盈天香醉而圍繞於時陳項之老褰衣而博帶皤皤然相造
而諏曰久矣吾黨之惑也倥侗顛蒙情嗜橫放恚愛我業聰明不
開日有忘其生生月無覺其滅滅一息之漏可勝言哉而今舉足
至于道場申臂及于淨土晝則目禪誦之事夜則耳鍾梵之音何

悟是生晚臻斯樂豈不思天子之至仁乎惻下人之昏墊適上聖
之昭軌假有相之途詣無生之理灑冥澤於已滅蒂元根於未始
百靈之所歸依萬宇之所欣喜非獨陳而已矣蓋神闢天聖開地
代之祖也纂帝寶基皇統孝之主也殄獠狂破魔孽威無外也廣
正典紹度門德無大也通幽洞明兼羸該精滂洋而行混濩厥成
一收功而四善舉一推心而羣願立咨如是則龍興之化曷有量
矣夫業可大而蕪沒焉不貽於後事可尊而苞蘊焉不述於代臣
子之罪也敢請圖之然言語之不到者心識心識之不到者眞如
二乘聞之而不見十地見之而未了而我云何能知能說竊比六
時之鳥七寶之樹是出乎和雅音聲是讚乎微妙功德記其在處
長者之金園銘其事因育王之石柱其詞曰
聖皇在上於昭于天唐雖舊邦其命維新龍興返政滅二暴臣少
康非擬於舜爲鄰皇王蒸哉其於廓元教生人戶牖神化洒心小
大稽首掌擎萬域潛移仁壽三代之前蓋未曾有最上乘哉其決

決陳服韓侯道之奕奕寶坊邦人造之天龍護持賢聖熙熙受福
維祺帝心則怡至理興哉其三

平淮西碑

韓愈

天以唐克肖其德聖子神孫繼繼承承於千萬年敬戒不怠全付
所覆四海九州罔有內外悉主悉臣高祖太宗既除既治高宗中
睿休養生息至於元宗受報收功極熾而豐物眾地大孽芽其間
肅宗代宗德祖順考以勤以容大慝適去稂莠不殍相臣將臣文
恬武嬉習熟見聞以爲當然睿聖文武皇帝既受羣臣朝乃考圖
數貢曰嗚呼天既全付予有家今傳次在予予不能事事其何以
見於郊廟羣臣震懾奔走率職明年平夏又明年平蜀又明年平
江東又明年平澤潞遂定易定致魏博貝衛澶相無不從志皇帝
曰不可究武予其少息九年蔡將死蔡人立其子元濟以請不許
遂燒舞陽犯葉襄城以動東都放兵四劫皇帝厯問於朝一二臣
外皆曰蔡帥之不庭授於今五十年傳三姓四將其樹本堅兵利

卒頑不與他等因撫而有順且無事大官臆決唱聲萬口和附并
爲一談牢不可破皇帝曰惟天惟祖宗所以付任予者庶其在此
予何敢不力況一二臣同不爲無助曰光顏汝爲陳許帥維是河
東魏博邵陽三軍之在行者汝皆將之曰重允汝故有河陽懷今
益以汝維是朔方義成陝益鳳翔延慶七軍之在行者汝皆將之
曰宏汝以卒萬二千屬而子公武往討之曰文通汝守壽維是宣
武淮南宣歙浙西四軍之行於壽者汝皆將之曰道古汝其觀察
鄂岳曰愬汝帥唐鄧隨各以其兵進戰曰度汝長御史其往視師
曰度惟汝予同汝遂相予以賞罰用命不用命曰宏汝其以節都
統諸軍曰守謙汝出入左右汝惟近臣其往撫師曰度汝其往衣
服飲食予士無寒無饑以旣厥事遂生蔡人賜汝節斧通天御帶
衛卒三百凡茲廷臣汝擇自從惟其賢能無憚大吏庚申予其臨
門送汝曰御史予憫士大夫戰甚苦自今以往非郊廟祠祀其無
用樂顏允武合攻其北大戰十六得柵城縣二十三降人卒四萬

道古攻其東南八戰降萬三千再入申破其外城文通戰其東十
餘遇降萬二千愬入其西得賊將輒釋不殺用其策戰比有功十
二年八月丞相度至師都統宏責戰益急顏允武合戰益用命元
濟盡并其眾洞曲以備十月壬申愬用所得賊將白文城因天大
雪疾馳百二十里用夜半到蔡破其門取元濟以獻盡得其屬人
卒辛巳丞相度入蔡以皇帝命赦其人淮西平大饗資功師還之
日因以其食賜蔡人凡蔡卒三萬五千其不樂爲兵願歸爲農者
十九悉縱之斬元濟京師冊功宏加侍中愬爲左僕射帥山南東
道顏允皆加司空公武以散騎常侍帥鄜坊丹延道古進大夫文
通加散騎常侍丞相度朝京師道封晉國公進階金紫光祿大夫
以舊官相而以其副總爲工部尚書領蔡任既還奏羣臣諱純聖
功被之金石皇帝以命臣愈臣愈再拜稽首而獻文曰
唐承天命遂臣萬邦孰居近土襲盜以狂往在元宗崇極而圯河
北悍驕河南附起四聖不宥屢興師征有不能克益戍以兵夫耕

不食婦織不裳輸之以車爲卒賜糧外多失朝曠不獄狩百隸怠
官事忘其舊帝時繼位顧瞻咨嗟惟汝文武孰恤子家旣斬吳蜀
旋取山東魏將首義六州降從淮蔡不順自以爲強提兵叫讎欲
事故常始命討之遂連姦鄰陰遣刺客來賊相臣方戰未利內驚
京師羣公上言莫若惠來帝爲不聞與神爲謀乃相同德以訖天
誅乃敕顏允愬武古通咸統於宏各奏汝功三方分攻五萬其師
大軍北乘厥數倍之常兵時曲軍士蠢蠢旣翦陵雲蔡卒大窘勝
之邵陵鄆城來降自夏入秋復屯相望兵頓不勵告功不時帝哀
征夫命相往釐士飽而歌馬騰於槽試之新城賊遇敗逃盡抽其
有聚以防我西師躍入道無留者雒雒蔡城其疆千里旣入而有
莫不順俟帝有恩言相度來宣誅止其魁釋其下人蔡之卒夫投
甲呼舞蔡之婦女迎門笑語蔡人告饑船粟往哺蔡人告寒賜以
繒布始時蔡人禁不往來今相從戲里門夜開始時蔡人進戰退
戮今旰而起左殮右粥爲之擇人以收餘僊選吏賜牛教而不稅

蔡人有言始迷不知今乃大覺羞前之爲蔡人有言天子明聖不
順族誅順保性命汝不吾信視此蔡方孰爲不順往斧其吭凡叛
有數聲勢相倚吾強不支汝弱奚恃其告而長而父而兄奔走偕
來同我太平淮蔡爲亂天子伐之旣伐而饑天子活之始議伐蔡
卿士莫隨旣伐四年小大並疑不赦不疑由天子明凡此蔡功惟
斷乃成旣定淮蔡四夷畢來遂開明堂坐以治之

竇建德碑

殷倅

雲雷方屯龍戰伊始有天命焉有豪傑焉不得受命而命歸聖人
於是元黃之禍成霸圖之業廢矣隋大業末主昏時亂四海之內
兵革咸起夏王建德以耕叱蠲興河北山東皆所奄有築宮金城
立國布號岳峙虎踞赫赫乎當時之雄也是時李密在黎陽世充
據東都蕭銑王楚薛舉擅秦然視其剗割之跡觀其模略之大皆
未有及建德者也唯夏氏爲國知義而尙仁貴忠而愛賢無暴虐
及民無淫凶於已故兵所加而勝令所到而服與夫世充銑密等

甚不同矣行軍有律而身兼勇武聽諫有道而人無拒拂斯蓋豪傑所以勃興而定霸一朝拓疆千里者哉或以建德方項羽之在前世竊謂不然羽暴而嗜殺建德寬容御眾得其歸附語不可同日跡其英分雄分指盼備顯庶幾孫長沙流亞乎唯天有所勿屬唯命有所獨歸故使失計於救鄰致敗於臨敵雲散雨覆亡也忽然嗟夫此亦莫之爲而爲者歟向令運未有統時仍割分則太宗龍行乎中原建德虎視於河北相持相支勝負豈須與辨哉自建德亡距今已久遠山東河北之人或尙談其事且爲之祀知其名不可滅而及人者存也聖唐太和三年魏州書佐殷侗過其廟下見父老羣祭駿奔有儀夏王之稱猶紹於昔感豪傑之興奮弔經營之勿終始知天命之莫干惜霸略之旋隕激於其文遂碑

唐梓州慧義精舍南禪院四證堂碑銘

并序

李商隱

聖敬文思和武光孝皇帝陛下在宥七年尙書河東公作四證堂

於梓州慧義精舍之南禪院圖益州靜無相大師保唐無住大師
與洪州道一大師西堂知藏大師四真形於屋壁化身作範南朝
則閣號三休神足傳芳東蜀則堂名四證乃今銓義與古求徒綵
札旣新睟容伊穆爰命詞客式揚道風蓋惟麾玉柄於元津初流
二諦隱金椎於覺路終駕一乘理在無言情殊有待慧問雲布誰
爭潤礎之功禪際河流匪兢浮槎之遠旁詢地志遐考山經昆陵
未曰天齊泰岳徒稱日觀定竺乾於身毒郭璞之言有徵證羅衛
於華胥王邵之書可信雖復一緣旣演五夢斯呈闕寂雙林崩騰
八國而心心授印寧關乾鵠之祥頂頂傳珠未待驪龍之寐吾知
之矣代有人焉惟無相大師表海遐封辰韓顯族始其季妹夙挺
真機見金夫以有躬拔寶刀而敗面大師得因上行豁悟迷塗載
驗土風東國素稱君子旋觀沙界西方是有聖人遂西謁明師遇
其堅臥俄烘一指誓續千燈火鼠衣光燭龍引焰燿如燈蠟雲若
煎膏師乃引與之言歎未曾有退從谷隱惟製草衣曳屨用自牧

之莠結束引難圖之蔓農夫乍去或議裁縫薙氏云歸方聞蓂積
寧思天柱詎學水田鮮華不望於鬱泥密致那期於刻貝加以峰
危鳥道林絕人蹊梁置之鹽鄰殊莫致鬱單之米界絕難通於是
椽栗無求梟此不掘想餘糧於蓬棵調美膳於苔垣吞沙了異於
羅旬得塊返欣於重耳昔平輿釋子猶餌石帆隴右沙門尙餐松
葉比若斯等方信莫同章仇兼瓊擁節內江分符右蜀因其百請
始議一來遇羯虜亂華鑿旌外狩局皇圖於巴濮指赤縣於犍泮
猱獠磨牙鯨鯢奮鬣上皇顯圖內禪自恃真期久披宸襟徐叩妙
鍵無慚漢室空禮清涼之臺有陋魏朝徒建須彌之殿道舍九主
恩浸四生獲永固於靈根實仰資於圓智時無住大師尋休劒術
早罷鈴經韜綦連之四弓捨步陸之七箭逕欣道在罔憚人遐坎
軻汾陰飄遙益部聿來胥會默合元符本惟肅於尊顏竟克諧於
妙果優孟之同楚相不亦遠哉丑父之類齊侯竟何爲也事雖可
引義則殊歸宴坐窮品化行奧壤頂輪降祉肉髻開祥及將寓信

衣乃誤因罷士經過九隧流落六羣彼既懸定於傳刀此亦熟驚
於祛篋璧畱曲阜詎爲張伯所藏劔出豐城豈是雷華可佩適來
適去悉見悉知故得大楚下從通僊右繞臂舒百福眉曜千光靈
禽例散於覺花瑞獸常銜於忍草寧止山神且屆但送甘松藩后
絕臨空分沈水凡茲異迹未可殫論杜相國鴻漸崔僕射旰並望
切龍門情殷荷擔畱迷待楯出病求攻克揚靜眾之名特峻保唐
之號蜀誠有矣楚亦宜然惟淇州道一大師古相標奇足文現異
俯愛河而利涉靡頓牛行過朽宅以銜悲頻迴象眎早從上首略
動遐心攜仁壽之刺刀振天台之錫杖過違百濮直出三巴拂衡
岳以徜徉指曹溪而悵望都遺喻後盡滅化城罷懸柝於頓門抗
前旌於起地披荆西裏坐樹南康有感則垂其肩入垂豎龜思邈
哽虎求探化漢水之漁人奚求往哲度青蘿之獵客肯愧前修智
藏大師以松闕之英梓潭之靈目廣青蓮唇飴赤果自有來而致
敬由無取以相歡綿邈星霜畱連几杖初聞四句誠爲入實之賓

末聽三幡了是無師之智遽援坐席令傳了經非取履於下邳還
稱可教異服膺於泗水更謂不如明牧前歸英人後感相紫階則
生金吐義禮白堦則盡竹書名彼四大士者皆行貫迦維名高記
蒞且夫紛綸藻繪列慈氏之雲臺合沓緗囊貯聖王之蓬閣我幕
府河東公天瑞地寶甘雨卿雲總海內之風流盛漳濱之模楷號
鳴文苑陟降朝階自作我上都統以京尹輦轂之下絳冕所興本
之以強宗近親因之以豪猾大俠丙吉爲相出遇橫屍袁盎免官
歸逢刺客公貞能盪蠱正可辟邪殷貨殖於五都無勞走馬屏椎
埋於三輔何必問羊託宿於天官假道於雒宅五年夏以梁山蟻
聚充國鴟張命馬援以南征委鍾繇以西事大張鄰援尋覆賊巢
旣而軍壘無喧郡齋多暇紗爲管帽布是孫衾神仙中人方其攜
手風塵外物乃以關身夢裏題詩醉中裁簡臨池筆落動草琴休
至於三堅八正之言四攝六通之說則理超文外照在機先修竹
長松不曾形迹孤峰澹澗未覺親疎鄙物物以肇端自如如而取

證讚同范泰律若張融王澄徒服其嘉言孟顛不知其慧業屬者
以洪州三大師靈儀未集華構將成乃進牘求真移書抒意江西
廉使大夫汝南公黃中秉德業尙資仁動之則瑤瑟瓊鐘鏘洋清
廟靜之則明河亮月浩蕩華池遠應同聲函緘遺貌試殿中監魯
郡鄒從古家承作繪藝有傳神授以齋修俾之雕煥情勞若病思
苦如癡拂壁但見其塵驚倚柱不知於雷震妙分塗掌巧寫應身
如安所洗之腸若見不沾之足詎同袁奮畫一室之維摩略等戴
逵寫五天之羅漢況刹懸慧義山聳長平花市分區香城轉軫龕
流迴漢梯倚重霄桂處吳剛榆邊傳說轡迴羲仲則日欲推輪門
啟蘇林則天堪倚杵斯堂也爰初置臬靡託金材或以篋當參於
焚燎如堪韜布恐劉肇以裁筒苟可當適慮蔡邕而製笛公遂養
之宏棟易以榮椽黃楠可訪於下巢翠篠罔攀於清渭漸鴻得桷
賀鶯依梁望同老氏之春臺牢若文翁之石室本乎初念逮彼成
功自一毛半菽之微至雕玉布金之麗皆不資官廩無取軍租非

飲馬之餘錢則遺盜之舊布將遣涪川習定鄴道降魔苟能浣爾
之塵勞莫不涉子之閩奧又院有緇叟族高隴西頃據方壇時稱
律虎晚修圓覺世謂義龍石磬朝吟銅瓶夜滿不局外戶靡立中
園公喻以傳香假其譚柄且山毛綜覈未挂支提許郭輩流偏遺
梵行斯固天機有裕世網無纏盍裒緡於縑緡可鋪舒於琬琰愚
也中兵被召上士聯榮敢同譙郡之功曹願作山陰之都講何言
此事叨謂當仁矧紅磴時尋多逢翠碣紫榛乍倚每見丹碑龍門
慕新野之能江夏服盈川之富恨不疆場俯接旗鼓親交貫其三
屬之犀皮焚彼十重之鹿角以靈才結課用逸思酬恩來者難誣
前言不戲庶使禰衡讀後重峻文科王粲背時更昇鄉品其詞曰
熙矣無上怡然至眞壽長滴海劫遠吹塵蒼茫去聖造次求仁誰
從多轍自涉殊榛婆斯南遊達摩東止智劒拭土信珠澄水道在
肝膽化行竹葦廬阜伸拳城安得髓猗歟靜眾來隔天溥遺珪擲
組燼指求心柔管代毳拘土延陰蘚含檀鉢露澀瓊針鳴光天靈

倉絲地望勢隔嚴道人同寶相梵眾來格魔軍內向犀枕金爐冰
崖雪嶂從容大寂挺拔曹溪情超地位意小天倪呦苑鹿喔喔
園雞融心露鏡刮膜模篋末有西堂克流英盼翦拂慧炬貫穿戒
線金浦涵月瓊崑躍電雲母飄花流黃舉扇我有命咨爾丹青
恢崇大厦寫載真形簷垂義網戶綴元扃三生聚石九子垂鈴公
實挺姿褰涵天壤捧日孤起橫秋直上謝安塵尾王恭鶴擎灰瑄
迎和霜鐘進爽六通勝範四證微詮蜂音出妙鳥偈留元傳真得
果聚福成田遼遼鵬壑眇眇龜年掩靄巴山繁華蜀國世界嚴靜
人天膺臆崇基式固芳音無斃長現優曇永觀摩勒

梓州道興觀碑銘

并序

李商隱

總天下之事教分爲三處域中之大道居其一發軔於希夷之境
解鞍於寥廓之場覽若士之遊九垓尙隘稽豎亥之步六合非遐
徒欲洞視焦螟遙驅野馬折尺捶而求盡循白環而待窮則元籥
猶嚴空筌尙滯輶推地盡莫知象帝之家蓋朽天穿未覩谷神之

隨柔皮具紙折骨疏毫雖竭慮於九三終致迷於萬一洎飛龜藏
義猛馬垂文貫王屋之深珠方摧中冀封吳宮之合璧始會塗山
變浩劫之桑田注羣黎之耳目聞其大較未可殫論及夫祕篆抽
奇隱書詮奧摧藏鳥跡鬱勃龍光太上七言揆靈才之縹綠元中
九錫賁神物之便蕃則固可促軫求音援柯拳秀存之則總橐籥
於虛空遣之則喪輜重於修塗故泣辜庠坐之君挺紀握圖之主
何嘗不畱連於太一招悵於上元考名都爲望幸之宮因爽塏爲
集靈之地一言以蔽百代可知梓州道興觀者五帝盤遊九仙卜
築銅梁對軫還疑鑄鼎之山錦浦均流未怯乘槎之水天彭割壤
井絡分纏挺夏后之靈妃滯震蒙之遊女乃知君王化鳥資是思
歸力士挽牛非將適遠往者大夫遺行著文自貶於巴歌中聞協
律設官作樂豈遺於渝舞照以火井潤之密房五色九苞鎮飛神
鳳三毛孫疑孔屢集文犀雖膏雨常霑使星時入而君平至死不
出靈關元彥平生未離嚴道亦中州之藩服上古之名區昔隋室

以綠字騰芳赤符宣慶尋思馬湏悅閭苑之遐遊顧慕龍鱗羨喬山之僞葬爰依翠阜式寫丹邱其始也漢苑澄泉華陰移土林中夸父卽貢宏材橋畔秦皇仍分怪石取方中於絳闕募大壯於元都臺實九層觀惟一柱瑤房疊葺陽樹攢融俄以九縣告哀三靈改物五芝八桂芻蕘者往焉四戶三階椎埋者至矣祝融有醉回祿無厭始燭火以興端終燠煙而合氣五明之扇將劫燒以爭飛十絕之幡逐崑燦而亂墜旣災巢馭亦斃池魚悲哀欲甚於戊辰厭勝不聞於壬癸旋爲散地便接蕪城田鼠誰燠封狼莫射梧雕碧鬢光風聚失於孫枝草沒彤闈浩露空溥於弟蔓我國家克將威命允富貞期李出伊墟洪惟命氏檜生陳郡藹有昇仙誓牧野之辰則盤古與天皇秉鉞入咸陽之後則尊盧與粟陸輦車納萬國於堂皇攜九州於掌握彼獨夫之所廢俟明辟以攸興斯觀復建蜺旌還張翠蓋不勞置臬而鷗閣飛來無待直繩而虬堂化出三宮主籙八治威魔羅郁倘遊遽分條脫安如乍至或送交梨開

元十七年太守張公重構石臺并投火齊九枝散影二等分光且
異金華送江南之夜讌寧同蠟炬佐洛下之晨炊號爲殊庭多厯
年所元和初祆興益部覺稔坤維鍾會之窺覲劉璋之闇懦梁橫
宋矢樓舞袁幢將禾麥於親鄰欲邱樊於福地遂使嵇瓜斷蒂董
杏分株瓊蘇入燃腹之間餽飯在抽腸之裏黃昏望斷不見青牛
昧旦神興唯逢白馬殆逾三紀闕校二官開成元年連帥馮公擁
蓋巴西揚麾左蜀永惟愛女名列通仙許長史之全家皆推道氣
茅東卿之繼世並有靈風乃夢寐徼規丹青往制旣分趙璧兼施
魏珠擬聳闕於天台狀重樓於句曲頓還舊觀且介通莊嗟乎焱
駕方畱化機潛迫削墨則公輪復去飛梯則宋翟還歸或沙版仍
虛或芝寮未豁或茵苔闕垂於倒井或椒聊罕遍於周垣圖石室
於西崑猶資粉墨畫銀臺於東海尙渴鉛黃仙家寧有廢興人世
自多休戚今皇帝駢闐靈貺合沓眞符爰顧寶臣來頒瑞節尙書
河東公華嵩衡霍麟鳳龜龍霑膏雨於豐年耀福星於分野加以

融微妙闕棲照元津書聖琴言論衡基品徵君虛幌未遠軍牙都
講曲櫺更聯賓閣周柱史之論上士張河間所謂仙夫有猷而九
牧具瞻無待而三元其獎女道士長樂馬行真廬江何真靖等並
下元受事大洞刊名積雪通襟高霞映抱鍊氣則穀仙畱訣迴顏
則桂父陳方華岳洗頭豈肯秦臺吹管陽城掉臂安能魯殿窺窗
永念洪紛每勤元貺義行於得眾事集於和光郡人焦太元等若
千人卓鄭遙源嚴枚遠胃懸情紫簡稟化朱陵爭攜莫逆之交其
就列真之宇靈姿載穆景從多儀岳瀆奔趨人天雜集十州倘見
三島如昇氣轉金樞則雲歸鷺瓦漏移銅史則星入鰕簾煥冰碧
以交輝儼環玼而迭映縱時更溟滓代變鴻濛於元黃未判之中
存轆轤無垠之狀行真等因標石闕來訪銀書子也五郡知名三
河負氣顏延年之縱誕未能斟酌當時王子敬之寒溫徒欲保全
舊物屬以魚車受寵壁馬從知子虛賦旣恨別時樂職詩空勞動
思況乎無仲祖之韶潤有彥輔之清羸髮短於孟嘉齒危於許隱

謝文學之官之日歧路東西陸平原壯室之年交親零落方欲春
臺寫望秋水凝情問句漏之丹砂餌華陽之白蜜惠而好我式契
初心聊復攀逸軌以裁襟撫空懷而選義揚子雲醬瓿之說蔡伯
喈壘曰之言斯文倘繫於汚隆後世何妨於知罪稽首歸命乃爲
銘曰

道實彊名先天地生淵默未朕寂寥無聲中黃立極元陽降精隱
軫金闕開華玉京其一於穆猶龍誕子靈族尼山設問函關著錄開
以九籥轉之一轂乃命雲孫納于大麓其二雲孫有慶開國於唐允
文允武宜君宜王充庭疊瑞罄宇儲祥連珠合璧氣紫雲黃其三大
澤斬蛇新野得馬泗水亭長邯鄲使者乾在地上豐照天下仁及
隱微謙稱孤寡其四載釐五緯肆覲三尊虔恭眞質偃曝靈恩彌縫
宇宙把握乾坤邈迤邃宇參差妙門其五惟此左川西南奧壤古有
經始今存顯敞瑤林瓊樹銅林寶網玉女雲衣仙人露掌其六吳宮
火燭熒道兵來聊於一氣示有三災壞因化往成由運開太顛寶

貝聲伯瓊瑰

其

長樂肇端廬江纘美英蕤秀萼旋綱步紀克蹈前

武能新舊址媚此綺都鄰於錦里

其

我之刊岳帝與令封青雲干

呂白日高春道心結課天爵醜庸沈研勝韻款至元蹤

其

九載念弱

齡恭聞隱語蕙纒蘭佩鴻儔鵠侶願騰華藻請事充舉如日不然

吾將誰與

其

十

大唐故光祿大夫右散騎常侍集賢院學士贈太子少保

海徐文公神道碑銘

唐故開府儀同三司檢校兵部尚書兼左監門中郎將大

內史城隍守備史大夫杜世威南陽郡太守贈司空文節

唐故開府儀同三司檢校兵部尚書兼左監門中郎將大

內史城隍守備史大夫杜世威南陽郡太守贈司空文節

唐故開府儀同三司檢校兵部尚書兼左監門中郎將大

內史城隍守備史大夫杜世威南陽郡太守贈司空文節

唐故開府儀同三司檢校兵部尚書兼左監門中郎將大

內史城隍守備史大夫杜世威南陽郡太守贈司空文節

唐文粹補遺卷第十

唐文粹補遺卷第十一目錄

碑二

撥川郡王碑

張說

唐贈丹州刺史先府君碑

前人

貞節君碑

前人

大唐故光祿大夫右散騎常侍集賢院學士贈太子少保東

海徐文公神道碑銘

并序

張九齡

唐故朝議大夫高平郡別駕權公神道碑銘

并序

獨孤及

唐故開府儀同三司檢校兵部尚書兼左驍衛上將軍充大

內皇城畱守御史大夫上柱國南陽郡王贈某官碑文銘

元稹

內學... 大夫士林... 南... 王... 某宮... 文...

... 大夫... 高平... 縣... 公... 縣... 縣...

... 文... 公... 縣... 縣... 縣...

... 大夫... 古... 禮... 常... 得... 樂... 寶... 訓... 學... 士... 融... 太... 子... 少... 尉... 東...

... 縣... 縣... 縣... 縣... 縣...

... 縣... 縣... 縣... 縣... 縣...

... 縣... 縣... 縣... 縣... 縣...

... 縣... 縣... 縣... 縣... 縣...

... 縣... 縣... 縣... 縣... 縣...

古文... 卷十一... 目錄

唐文粹補遺卷第十一

吳江 郭麐 祥伯 纂

英山 金勇 仁甫 校

撥川郡王碑

張說

珠玉無遠而登輦輅之飾寶也松栝無幽而入殿堂之構才也物
貴其用人亦如之撥川王論弓仁者源出於疋未城吐蕃贊普之
王族也曾祖贊祖尊父陵代相蕃國號爲東贊戎言謂宰曰論因
而氏焉公有由余之深識日殫之先見陋偏荒之韋毳慕上國之
衣冠聖歷二年以所統吐渾七千帳歸於我是歲吐蕃大下公勒
兵境上縱諜招之其吐渾以論家世恩又曰仁人東矣從之者七
千人朝嘉大勳授左玉鈐衛將軍封酒泉郡開國公食邑三千戶
周語曰犬戎樹敦守終純固今其俗曠而輕死其法折而不撓故
前代無降人中土無僮僕自公拔身向化首變華風澤路之間始
見戎州矣若夫河南胡苑坰牧所利每歲冰合虜騎是虞中軍必

謀於元老亞將固遷於時傑神龍三年以爲朔方軍前鋒游奕使
景龍二年換右驍騎將軍開元五年兼歸德州都督使皆如故八
年遷本衛大將軍改朔方節度副大使公之理兵也堅三革利五
刃偶拳勇齊足力信賞罰分甘苦六轡如手千夫一心接獠猶
蚊蚋臥沙塞如衽席薦居露食垂二十年雨畢而成師冰泮而休
卒寒風入於肌骨夜霜出於鬚鬢人不堪其勤公不改其節韓公
之建三城也公洗兵諾真之水刷馬草心之山以爲外斥而版徒
安堵鄭卿之和默啜也公授館李陵之臺致饗光祿之塞以爲內
候而賓至如歸九姓之亂單于也公四月度磧過白檉林收火拔
部帳納多真種落彌川滿野懷惠忘亡漠南諸軍避其計也降戶
之叛河曲也公手騎奮擊萬虜奔走戡翦略定師旅方旋而延陘
蹊跌復相嘯聚上軍敗於青剛嶺元帥沒於赤柳澗公越自新堡
奔命寇場羸糧之徒不滿五百凶醜四合眾寡萬倍公殺牛爲壘
噉寇爲餉決命再宿衝潰重圍連兵躡踵千里轉戰合薛訥於河

外反知運於寇手方朔諸軍壯其戰矣斫摩之奔也邀於黑山口
覆其精銳布思之背也追至紅桃帳掩其輜重乳泊之會刺蘭池
之狂胡木盤之役縲方渠之逋寇凡前後大戰數十小戰數百算
無遺策兵有全勝是以六狄逃遁三垂又寧聲暴露於天下業光
華於代載信皇威之所加亦武臣之力也故錦衣寶玉允答戎功
甲第良田丕承錫命語其智効未甚優寵黃頭黑齒比價齊名積
戰多瘡累勞生疹恩命尙藥馳往診之晉豎已深秦醫無及十一
年四月五日薨於位高年六十制贈爲撥川王稱故國志其本也
太常議諡曰忠由舊典昭其行也長子盧襲官封繼事業次子舊
久特拜郎將十二年四月詔葬於京城之南懷遠人也太常鼓吹
介士龍旆虎帳貌裘封犛殉馬吉凶之儀舉夷夏之物備長安令
總徒以護事鴻臚卿序賓以觀禮哀榮之道極矣君臣之義厚矣
有命國史立碑表墓吾嘗同僚敢味遺烈銘曰

黃河接天青海殊壤舉世安俗拔俗誰放倬哉論侯利有攸往奮

飛橫絕搏空直上以眾款塞因敵立勳吐蕃萬戶吟嘯成羣精感
天地氣合風雲既封酒泉乃位將軍朔方陰塞直彼獯虜帝命先
鋒闔如虢虎山北加竈漠南擊鼓十數年間耀國威武我有師旅
將軍鞠之我有邊眈將軍育之柳澗亡師一劒復之蘭池叛胡三
戰覆之武節方壯朝露不待王爵送終宿恩未改時來世去人物
如在銘勳謚忠以告四海

唐贈丹州刺史先府君碑

張說

府君諱隲字成隲范陽方城人也張祖曰揮帝軒之允肇勳弦木
錫姓上矣詩有卿士孝友史有畱侯世家八葉至東漢司空皓公
子宇北平太守始居范陽四葉至西晉司空華公子翬散騎常侍
乃僑江左昆孫太常復歸河洛故河東有司空砦洛陽有散騎里
後司空至府君十二代不失仁義矣王父諱弋周通道館學士考
諱恪無祿早世府君熒生遺育四代單緒家世尙儒不及伯魚之
訓外祖爲理遂讀臯陶之書以明法歷饒陽長子二尉介休主簿

洪洞丞以所願乎下事乎上以所願乎上交乎下反身與人何往
不順臺選貞白覆囚山南人謂是行有典刑矣昊天不弔年五十
二調露元年十二月乙卯捐背於縣廨夫人長樂縣太君馮氏父
威藍田丞敬修法度踐涉圖史顧復幼孤將就成立家道不殞夫
人是賴盲年七十有二傾背於東都康俗里第光珪說不天夙遭
閔凶又集荼蓼先王制禮不敢從滅以景龍二年七月己酉安厝
於萬安山陽耐從周制也惟先君不祿俸不奉親不機杼不資身
僚舊無鷄黍之接况非其類乎族姻無魚菽之受况其人吏乎是
全其高而善其獨也過四十始閱六籍觀詩得之厚觀書得之恆
觀樂得之和觀禮得之別觀春秋得之正觀易得之元曰君子多
乎哉事斯一言而已矣每誦道記三復三寶曰至人之心有以垂
世又聞之太夫人云吾有子五十載非其疾無一日之憂先夫人
亦云吾事夫子三十年耳無忤聲目無暴色先君子之違世也其
憂戀者尊門在殯歟聖善在堂歟我諸孤無日敢忘及王母終養

二祖封崇亦尙克家成遺訓矣若夫安親孝也宜家義也翼子慈也軌迹隱乎含光故當代罕耀馨香發乎潛德故明神終勞先大夫久而益榮沒而不朽蓋此景雲二年天子嘉侍臣之匪躬念前人之蘊德二月乙巳詔曰故官某毓德高邁藏器下僚代載儒雅家傳清白河東佐邑長不欺之風山南覆囚溢無冤之聽徂謝永久邱墳不飾啟茲令允貞事先朝宜崇追遠之恩以表揚名之志可贈使持節丹州刺史王澤漏乎泉壤國禮崇乎宗廟漢帝論士恨不見李牧之爲人曾子思親泣無逮楚王之厚祿道存運往痛矣餘悲緬尋前哲之所以聞無聲於四海視不見於百代者匪銘頌歟桓麟蔡邕其則不遠嗚呼霜露交積松檟滋深兄弟永懷相顧將老胡伯虎豈敢掩大人之清陳季方何足知家君之德小子銜恤非曰能文莫假辭於他者務傳信於我也銘曰

猗嚴考用元妙體太和竭高志貞夫一戒其多孝於親正於家形於訓清厥心晦厥迹畏厥聞寶如何其謙儉孝慈皇哉褒德永世

有詞

貞節君碑

張說

神功元年十月乙丑陽鴻卒於雩都縣友人沛國朱敬則清河孟
乾祚范陽盧禹等哀鴻抱德沒地繼體未識考行定諡葬於舊域
鴻字季翔平恩人也其先著族右北平郡大父眞陽宰適茲樂土
爰定我居惟桑與梓旣重世矣鴻倜儻奇傑瓌瑋博達貫涉六籍
百家之書其要在霸王大略竒正大旨君親大義忠孝大節而已
章句之徒不之視也嘗陋漢史地理志周禮職方志時異虛記心
不厭焉乃攀恆岱浮洞庭窺河源踐岷衡稽四海之風俗算九州
之險易與趙國貫高圖獻其議遇火焚盪天下壯其志而痛其事
養徒閭里不應賓辟儀鳳中河北大使薛公舉鴻行厲貪鄙天子
喜之用寘于吏乃尉汲曲阿主簿龍門雩都夫其屏居十年一方
化德厯佐四邑諸侯觀政惜乎有大才無貴仕命也初鴻遊太學
有書生山東李思言物故南館鴻傷其終遠家屬有喪無主乃駕

樞車送歸東土及在曲阿敬業作難潤州藉鴻得人歷旬堅守城
既陷而猶鬪力難屈而蹈節寇義而脫之因僞加朝散大夫卽署
曲阿令鴻貞而不諒詭應求伸既入邑則焚服闋門而設拒矣故
得殿邦奮旅一境賴存淮海底績勳答効功卒不言賞賞亦不及
君子以爲急友成哀高義也臨危抗節秉禮也矯寇違禍明知也
保邑匿勳近仁也義以利物智以周身禮以和眾仁以安人道有
五常鴻擅其四武有七德鴻秉其六大慮克就之謂貞好廉自克
之謂節粵若夫子可諡爲貞節也已於是紀名垂迹表墓勒石其

詞曰

倬良士縱自天辯方物覈山川厥志大哉峻剛節殷義聲返旅櫬
宴窮城厥德邁哉哀斯人命莫贖德不朽溫如玉軌來世哉

大唐故光祿大夫右散騎常侍集賢院學士贈太子少保

東海徐文公神道碑銘

并序

張九齡

夫物之所宗也莫善乎德行道之以明也莫先乎文學人倫以具

體爲難世業以濟美爲貴有能兼之者其東海公平公諱堅字元固其先東海郊人永嘉之後仕業南國因家吳興焉隋氏平陳徙族人雍今爲馮翊人也原其伯翳平水土實佐文命偃王行仁義大啟徐方因國保姓克昌厥後逮乎漢魏閒出仁賢十二代祖晉江州刺史順德簡侯寧至五代祖梁直閣將軍慈源侯整整生陳始安太守綜綜生隋延州臨真令方貴方貴生唐果州刺史孝德孝德生唐西臺舍人贈禮部尚書齊暉出入六朝載紀數百文武冠冕存沒光靈訓子克家謀孫必復賢風儒行世有其人公卽尚書府君之元子也生而潛發默識經藝粵自童齠則善文言時先府君爲沛王侍讀公之岐嶷聲振平臺王聞而延佇與之談議授簡能賦博奕惟賢門客府寮深所厭服奄遭不造十四而孤祖母金城郡君姜太夫人念其聰異誨以志學公遂刻勉詣心精微磅礪九流激昂三變景倩幼露實賴愍孫令伯大成仰由祖母上元中遭姜太夫人喪哀幾滅性制則從禮有感斯絕無聲常淚服闋

州辟秀才其年登科解巾補汾州參軍事部送邊糶至於定襄軍使王本立素重公才署爲管記書奏謀算悉以咨之坐耀鋒銳未嘗肯緊尋而換雲陽尉萬年主簿親累出爲揚府功曹振鱗將搏載躍京轂垂翼遠近有聲東南俄遷太子文學時祕閣羣籍大抵訛謬有敕召學士詳定公實在焉爲之刊緝卷盈二萬時輩絕倒服其博達尋與李嶠等選三教珠英書成奏御拜司封員外尋加朝散大夫卽拜郎中稍遷給事中以公代及文史詞不失舊雖居瑣闥尙比纏牽遂除中書舍人君子曰舜之官人也二年敕公修則大聖后實錄及文集等絕筆中宗嘉之璽書敦慰賜爵慈源縣子資物五百段旌良史也遷刑部侍郎加秩銀青光祿大夫轉禮部侍郎兼判戶部公久踐朝廷累登省閣舊章必諫卽事無疑雅不煩文深得大體雲臺高議以此歸之進封縣伯食邑五百戶兼昭文館學士受詔與天竺僧菩提流志譯寶積經及柳沖等同修姓氏系錄三教寶真萬族有倫亟見成矣太平公主內秉國權駙

馬武攸暨外收人望命公至第拒而不行惡夫佞也景雲初今上
夷亂主鬯東朝宮相四員時難其選二以宰臣兼領一則天子故
人任良兩宮實在公矣遂除右庶子兼崇文館學士修史如故進
爵東海郡公食邑二千戶遷右散騎常侍以本官兼黃門侍郎尋
而卽真祿賜同三品爵崇五等道茂兩宮利君謀身舉代皆譽又
以刪定格令承恩進爵二等公請迴授叔父齊莊帝用懷之遂封
齊莊爲長城縣子天下義士莫不激昂焉侍中岑羲公之姻婭與
其聯事深自危懼求典閒司以遠祇悔遂改太子詹事迨羲禍敗
地絕嫌疑先是不交定王及此不昵岑氏見炎莫附思患預防信
達人也復以親累出爲絳州歷永蘄棣衢四郡山川分位楚夏異
齊公政不易宜教以因俗德化歸厚人其由之開元中會同京師
遷祕書監無何轉國子祭酒皇帝稽古崇訓開堂集儒以公才學
元長命登首席遂令集賢殿修撰又除右常侍以公爲學士副丞
相燕公知院事綢繆顧問日月獻納恩渥尤及少有其比上將柴

於岱宗詔公草其儀注定禋祀之位廣配類之儀博文約禮或沿
或革言出而入伏事立而天從時議遠矣及禮畢承恩特加光祿
大夫時置十銓公在分掌程不愆素且無遺才公既贊相謨猷從
容諷議大鍾必諫溫樹不言啟沃盡規實致君於堯舜死生有命
空比德於老彭高年若干以開元十七年龍集己巳五月丁酉薨
於長安頡政里之私第聖人震悼君子稱嗟翌日有詔褒贈太子
少保贈物若干段粟若干石特遣中使內侍伊鳳祥弔祭而別賜
布帛若干端匹俾鴻臚少卿元復監護葬事官給鼓吹儀仗太常
考行曰文君子曰仁而愛人敏而好學家有榮業紹其弓治國有
大事修其典章諡之曰文不亦宜乎其年冬甲子與夫人故南陽
郡夫人合葬於萬年縣之少陵原先塋禮也公寬裕有禮溫良能
斷智出於象外樞得其環中行之積也厚名之立也大故起自黃
綬累踐赤墀五省推高連州得最事將時并位與才偕莫之天闕
也至於升堂入室探微覩奧動有禮樂之運言有雅頌之聲是惟

無作作則萬物和而八音備矣蓋嘗注史記修晉書續文選大隱傳及有文集三十卷皆資於故實博於遺訓古今通變河漢其高或藏名山或升天府壘壘然各得其所嗚呼文仲歿而其言立子產終而遺愛存公則備焉宜受戩穀保艾厥後代代守之有子曰峻嶠魄等才以雅著孝以特聞學茂高曾之科旨詞雄祖考之風格備歷清貫皆立能名三賢德聲方賈氏無愧累葉儒訓與班門孰多咸瞿瞿如皇皇如昊天不追終身積痛求舊摺實勒諸墳道僕從述者之後敬而伸之乃爲銘曰

舜命益虞疇功帝俞偃行文教代集通儒光華鼎闕出入秦吳門多長者君其最乎其會是好學果行洵美日就鱗成風積鵬起黃綬覆篲朱門方軌官籍正人朝稱良史其三入承明五遷外郡道有出處心齊喜慍帝思啟沃國尙師訓屢獻箴規偏承顧問其居常有異博而無惑綿蕝孫通銓衡叔則爲龜爲鏡立言立德胡不慙遺左右王國其悼興冕旒哀結衣簪官供羽仗士惜人琴已矣

終古平生德音松枝掛劍碑字生金_其

唐故朝議大夫高平郡別駕權公神道碑銘

并序

獨孤及

開元天寶之際元宗始以公柄付三公由是台司得專其廢置其中或憑寵固位懼天下有異己者諸附離之者皆出入三臺若公才令名以望見憚則稍稍優其俸而黜其職故天水權公幼明由新安縣令爲絳郡司馬高平郡別駕而歿同於道者皆竊歎之是歲天寶六載秋八月也歿後廿有二載歲次乙未春二月返葬洛陽故塋夫人新鄭縣君榮陽鄭氏耐壽縣君某縣某官某之孫某之子以仁儉好禮輔佐懿德柔明之風訓齊閨門壽六十五大曆二年十月某日終於丹陽初公娶於博陵崔氏生子曰驥而終新鄭以繼室生四子曰軼曰申曰器曰舒舒不幸短命驥軼申器悉忠信好學善屬文位未顯而令名歸之慶之垂訓之流也至是既卜宅兆驥等懼日月逾遠後裔不知其先人之德善謂及忝鄉舉

之舊故使錄而銘之云公諱徹字幼明隴西天水人也權氏之先
出於顓頊其遠祖殷武丁之小子生而有文在手曰權因以權受
封且命氏焉至周爲楚武王所滅國除其後有仕隴西者遂家於
天水歷漢魏晉宋閒子孫世都尉爲郡守至裔孫翼與王景略同
佐苻堅官至僕射後僕射數世至景宣景宣生士玠並知名於時
士玠生萬春歷華州刺史封千金縣公華州嗣右領軍將軍曰文
獎領軍嗣永興令曰懷育公永興之嗣也奕葉之明德粹氣藜於
其躬故融而爲仁行播而爲文學童子時舅氏崔湜奇其文嘗謂
有何無忌之似其鄉舉也考功郎中蘇頌拔諸羣萃之中連尉湖
城汾陰新繁渭南河南五縣開元二十三年拜監察御史會監祭
太廟先時同事者約相與偕赴及將赴祭約者有女三進不暇
告公曰人約我矣可先已而後信乎遂不赴坐是降爲河南府法
曹君子義之初選部舊制每歲孟冬以書判選多士至開元十八
年乃擇公廉無私工於文者考校甲乙丙丁科以辨論其品是歲

公受詔與徐安貞王敬從吳鞏裴肱李宙張烜等十學士參焉凡
所升獎皆當時才彥考判之目由此始也於是天下無兵百二十
餘載縉紳之徒用文章爲耕耘登高不能賦者童子大笑公攘臂
其閒以仁義爲己任片言隻字動爲學者所法時輩榮之而居家
清方惟德禮是仗潤身飭吏不過經術不矯持操以游媚貴幸行
威作福者忌之由是官徙而階不遷從法曹數歲而後有新安之
拜及至歷絳郡高平任愈疎遠安貞中立未嘗易方虛舟其心與
位升降春秋六十四而終蓋道之行止與時不并論者以漢梁叔
敬桓君山爲比公所著文二十卷其立言之宗趙郡李華編而序
之若歲系事業則書諸斯文其文曰

嗚兮權公有德有言忠恕廉清道直而溫行有餘力言足成文居
官釐績勤約是守與明以信寧黜不苟跡屈志伸義彰身後再政
游學左詩潘諫風流遺烈足以遺子九原與歸末由也已

唐故開府儀同三司檢校兵部尙書兼左驍衛上將軍充

大內皇城留守御史大夫上柱國南陽郡王贈某官碑

文銘

元稹

南陽王姓張氏諱奉國本名子良以某年月日薨於家其子岌哭於其黨曰唐制三品以上歿既葬碑於墓以文其行我父當得碑家且貧無以買其文卿大夫誰我肯哀者由是因其舅捧南陽所受制誥凡八通歷抵卿大夫之爲文者予與焉子故聞南陽王忠功每義之然其請明日子岌狀其故聞官闕以告曰我南陽西鄂人我高祖盈左武衛將軍閑廐使我曾祖蘭朝散大夫沙州別駕我祖景春朝請大夫太僕少卿我父南陽王太僕府君之第某子也少學讀經史子至古今成敗之言尤所窮究遂貫穿於神樞鬼藏之間而盡得擒縱弛張之術矣大厯末始以戎服事郭汾陽於邠建中中以騎五百討希烈於蔡遭太夫人喪號咷請罷遂克終制僕射張建封以壽帥移於徐始以渦口三城授於我僕射歿而徐師亂子乘亂以自立王不忍討以師二萬歸於潤德宗異之詔

召至京授侍御史復職於浙西就加御史中丞又加國子祭酒是
元和之元年也二年李錡叛王擒之以獻加檢校工部尚書兼右
金吾衛將軍御史大夫上柱國進封南陽郡王食實封一百五十
戶遂錫嘉名尋遷檢校刑部尚書充振武麟勝等州節度營田觀
察處置等使復以刑部尚書兼左金吾衛將軍御史大夫歷左龍
武統軍鴻臚卿就加檢校兵部尚書轉左驍衛上將軍充大內皇
城留守以疾薨壽八十三特詔贈某官我南陽郡夫人熊氏祖元
皓皇朝禮部尚書左金吾衛將軍進國公歿與嵩南陽夫人之二
子也嵩任某官歿以某官喪制葬以某年月日於某地歿不肖
能言先將軍之職官而不能知先將軍之勳業矣乞爲碑予按僕
射張建封以貞元十六年薨於徐徐人立其子愔求命南陽王不
義其所爲以渦之妖盡棄去由是泗濠之守皆據郡愔不能令卒
帖徐由南陽王之斷其臂也元和之二年潤帥錡求覲京師既許
之不克覲辱中貴人殺其臣寮以令下揚帥鏐以叛告朝廷甚憂

之初錡筦鹽於潤有年矣削虐暴狠其下甚畏之而庫庾之藏以億計潤之師故南韓晉公之所教訓弩勁劔利號爲難當是時初定蜀兵始散物力未完加誅於錡甚難之憲宗皇帝不得已下誅詔不浹日露章自潤曰十月十二日錡就擒從亂者無遺餘問其狀則曰錡旣叛以是月十一日命南陽王田少卿李奉仙率銳眾以圖池南陽王喜養士又能爲逆順言明日與二將誓所部迴討錡城守不敢出環其城是夕攻愈急錡眾壞散縋於城下遂就擒自是南陽王勳名顯於代性卑順不伐在振武時以檢儉同士卒勞苦居餘官皆謹慎專至知不及在朝廷十餘年似無功能者未嘗圖進取薨之日家甚貧幾無以葬其身天子憐之廢視朝賜布帛給班劔鼓吹以葬之嗚呼舉三十年爲言其閒至將相者凡百數耳目相遠之後非其子孫能識其姓名者十不能一二焉若南陽王縛錡棄情全徐完潤自取爵位以貽不朽無幾希矣碑於其墓不亦宜乎銘曰

在昔徐帥知於南陽付授兵柄渦俾爲防徐喪其帥徐人恃強強
以愔嗣不歸其喪我欲盡殄愔亦與亡不忍自我焚其構堂我或
不去愔童必猖猖甚則蹶其能久長乃挈萬眾賓於鄰疆愔果愔
愔不假不狂逮及終歿全歸其吭潤錡待我不踰於行一日叛誕
肆其昏荒我乃遽取歸之天王非不可殺示人不戕報愔以惠報
錡以常稱示厚薄俾之相當克勇克義不伐不揚銘於墓石以永
無疆

唐文粹補遺卷第十一

唐文粹補遺卷第十二目錄

碑三

鮑防碑

穆員

鄭國夫人神道碑

張說

紀信碑

陰盧藏用

唐故太尉廣平文貞公宋公神道碑側記

顏真卿

唐洪州百丈山故懷海禪師塔銘

陳詡

杭州徑山寺大覺禪師碑銘

李吉甫并序

唐文粹補遺卷第十二

吳江 郭磨 祥伯 纂

英山 金勇 仁甫 校

鮑防碑 穆員

有唐尚書東海宣公姓鮑春秋六十九公從三十六載致政二一作

三年歷官二十五凡居達官之長十二領四嶽十三州牧之寄三

貞元六年秋八月景申薨於洛陽私第冬十月旬有七日從先公

於北邙南原一作詔贈太子少保給鹵簿鼓吹旌其卒葬後三年

嗣子宗由惟中古封樹之制且曰邱壠與年代相推幾何而平松

柏與霜露相薄幾何而盡將令百代之後遊九原者徘徊不朽之

烈歎息可作之美其惟金石刻乎是用建碑墓以揚先懿公諱防

字子慎河南洛陽人其先蓋夏禹之苗裔春秋時杞公子有仕齊

者食采於鮑因以命氏曾祖標一作皇隴州汧陽令祖仁爽雅州

飛越尉贈眉州刺史父思溫彭州唐昌丞贈工部尚書皆盛德下

位發祥於公天寶中天下尙文其曰聞人則重侔有德貴齒高位
公賦感遇十七章以古之正一作名法刺譏時病麗而有則屬詩者

宗而誦之舉進士高第調太子正字中州兵興全德違難辭永王
去來瑱爲李光弼所致光弼上將薛兼訓授專征之命於越輟公
介之始兼訓之奉光弼也以順命爲忠不及於義公知光弼之不
終也諭而絕焉東越仍師旅饑饉之後三分其人兵盜半之公之
佐兼訓也令必公口事必公手兵兼於農盜復於人自中原多故
賢士大夫以三江五湖爲家登會稽者如鱗介之集淵藪以公故
也徵尙書郎優游公卿閒執政者以代言之司見屬無何薛兼訓
寢疾太原上以北門寄重軫念於薛思所以貳而代之者莫與公
比召對勞賜寵而遣之公之至也人不知其帥之疾帥不自知其
疾及其代也由亞尹中丞洎居守專征之倅各遷其任一作各還其長兵
自勇厲至於輯睦人自安業至於移風政自無闕至於有典代宗
嘉歎之不足圖寫公形列於別殿蓋麟閣名臣之次也三載朝覲

屬今上嗣位惟新大政授公紀律俾作典刑拜御史大夫旋以文
武之柄方鎮爲大南國萬里俾之師長統閩越轉江南公之撫人
也以家勤之以子愛之利用用之厚生生之詔加銀青光祿大夫
右散騎常侍紀成績也眞拜右常侍扈從巡狩轉禮部侍郎上還
鎬京展謝郊廟公預太常折無文之禮進封東海公詔徵賢良求
其讜言時薦員一作仲兒不敢違詔承詔原注絕句實蒼生利之宰臣病
之與公並命考第者以爲異日故事言或有犯投之不疑焉公曰
使上聞所未聞聖朝之瑞也擢居甲第每歲貢士充於王庭心爲
靈龜事絕請託京師仍歲蝗旱務殷人耗拜京兆尹詔下風行令
宜政舉威革難理惠周無告旣而痿痺生疾陳乞遂聞上置上將
軍員以待功臣先用文儒耆耄以寵其選拜右武衛上將軍厥疾
加劇優詔授工部尙書致仕徙家東周富天祿貴天一作爵樂天
命順天和以終夫天年嗚乎賢哉公德本於孝才歸於用從王牧
人卽戎臨事大略以忠肅慈惠沈毅莊敏爲稱喜善怒惡不必爲

已論交任人必惟其終入爲羽儀出作藩翰夔夔然以家人嚴君
之義屬於長兄蓋什卿之祿千乘之賦一以奉之四時賓客之事
車服器用之費一以稟之公與夫人視諸孤羣從唯所授公不敢
以禮秩異夫人不敢以居有私而敬公和樂之道於是乎久御史
中丞武威賈全公之甥也少長於我登朝異門教切義方慈均天
性故全之報也稱天下甥舅加禮焉一作加鄭滑節度使隴西李
融公之吏也推以腹心齊厥憂寵歷佐三道其閒如一故融之報
也類天下賓主加歡焉於全也見公之內於融也見公之外然則
公之行已與人可知矣夫人蘭陵郡夫人蕭氏始佐公賢終成公
貴及公旣沒清風如同二孤前左衛兵曹參軍殿中省進馬宗參
以文學世公之業孝友繼公之志猶日不足以抒夫罔極於是發
揚垂裕之義作爲銘曰

穆穆宣公爲王蓋臣終始明哲優游寵勳在昔理平逢時尚文高
唱寡和長才不羣星河麗天卉木榮春羽翰方陸雲雷構屯乃佐

戎師名屈道伸乃登天朝盛美惟新茫茫南國赫赫北門股肱王
室父母生人執憲永式尹京作則春官主文宗一作常伯尙德出捍
牧圉入趨宸極望實攸并謀猷允塞賢宜翼聖道厄於命方叔元
一作員老冉耕所病明明天子禮優致政曳履散金頤眞保性良辰
何遽厚夜何長歸全故邱一作邱鞏洛之陽貞石是勒德音孔彰於
戲宣公百世不忘

鄭國夫人神道碑

張說

鄭國夫人者宏農楊氏之女也開元神武皇帝惠妃之母曾祖諱
諶以禮樂習文爲越州司馬祖衍以折衝學武爲游擊將軍父宏
以門才入仕爲雍縣丞而早卒初則天之代夫人言歸武氏曰恆
安郡王生惠妃及家令忠太子僕信開元十年三月終於通化里
其四月卜宅於少陵原哀子銜恤號天仰訴怨報德而未得託思
齊於永慕皇帝悒鸞殿之內憂悵鶴池之外慘揚淑聲而金石刻
揭高行而天地感國史司文命爲鄭志若夫清明下濟嶽瀆上昇

祥會德門慶育邦媛神授孝理之性天啟聰達之心加以潤澤詩書游玩圖傳伯宗好直預戒將亡重耳羈游先稱必霸豈直漢庭章奏假借仲長之才周官禮儀咨稟宣文之學昌言嘉論有如此者螭首螭領修眉橫波旣工嘖笑易爲容止肅恭而不跼舒和而不倨商周革命遇屯有怡懌之顏桑霍傲予在貴無驕矜之色端容一貌有如此者紘縵祭服闕翟朝衣纂組入神翦制驚國雕胡之飯露葵之羹五齊六清三齏七醢咸一見而洞理或不習而知和女工中饋有如此者惠妃載誕皇子在者四人驪泉多龍丹穴皆鳳克岐克疑預見元凱之才實覃實訏早聞霄燭之艷亦關陰德之潛襲胎教之密傳乎又名子以義成家以禮忠者以令德爲忠信者以不欺爲信傳云去食存信信而有徵經云移孝爲忠孝則不匱周宗咸覆紀季獨存至德深圖有如此者壁司徒之妻邑其合禮南城侯之婦封其舊功况夫愼徽四德四德咸舉經綸二義二義克從匿武收繼趙之勳產姚承配夏之慶吹凱風於椒掖

外王母於梧宮盛德大業窮光極寵啟國西鄭不亦宜乎十數年
閒二子榮立每至四時令節六參嘉會魚軒照門龜艾交室爲壽
則珠貝山積侑幣則錦綺霞飛白玉滿堂聚姻親而同有黃金作
穴散鄰里而無餘君子欽其市義聖人嘉其實儉故寢疾則飲食
天厨湯藥御府匪日伊夕上宮絡繹於闈庭送終則威儀傾都車
騎曠日自宮徂野中使相望於道路哀榮之盛書記罕聞猗歟所
謂小君之遺美聖善之高烈者也如使後代考南史議西陵披簡
牘而歎息臨山原而茫昧旌賁之道不其闕而然則外孫之碑武
擔之石非明淑之壟其何設焉辭成進御帝稱曰善願謂尙札我
其書之於是洒翰黃縑鏤字青琬雲橫波蹙神變艷爛於山門鶴
倚鸞翔生氣宛延於松路禮尊事絕恩榮迹遠斯又元德動天幽
誠迴日之奇致也誰昔未覩名言莫逮係曰
代有母德厥氏楊兮祖考爲士父爲王兮聖后中葉總萬方兮天
命未改復歸唐兮賢淑啟佑繼絕亡兮宗周雖滅神女昌兮建號

西鄭榮舊鄉兮魚軒翟莠盛龍光兮二子雙飛華綬章兮出人輪
奐庭鞞煌兮去此昭昭卽茫茫兮何處詔葬少陵阜兮貴妃慈親
侯王舅兮寒暑流易山川久兮古墳坡陔老樹朽兮壽宮靈寢百
代守兮頌石光華千載後兮

紀信碑陰

盧藏用

長安元年鄉人白孔府君請爲紀公建立碑表府君具狀申請而
州寮以爲異代風烈令式無文且懼鄉人頭會抑而不建孔府君
感激忠義拘牽下僚乃歎曰吾以不才忝茲邦政至於激貪勵俗
旌孝尙忠臣子之行教化之端也鄉人之請允有禮矣吾可以嘿
歟至二年七月乃自減私俸將斲石采山以旌忠烈會有耕闕一
於紀公墓側居人田中得一古石磨礮俱闕一但無文字其螭首
及兩側龍距文髣髴有子丹碑法生動之勢非近工所爲詢之故
老莫究年代府君遂酬地主之直樹之於墓刊勒斯頌豈神明昭
應有所感發哉何其幽顯之符會也鄉人奔走而觀者甚眾咸喜

紀公有述幽石自彰闕一以崇宰君之徽烈表至誠之必感夫減
俸以旌賢至清也希古以砥節至忠也不然後闕一何以仰德而
立名哉乃於碑陰刊紀斯異

唐故太尉廣平文貞公宋公神道碑側記

顏真卿

初公任監察御史持服於沙河縣屬突厥寇趙定州河朔兇懼邢
州刺史黃文軌投艱於公公以父母之邦金革無避及賊至城下
公爲曉陳禍福其徒有素聞公威名者乃相率而去之開元末安
西都護趙含章冒於貨賄多以金帛賂遺朝廷之士九品以上悉
皆有名其後節度范陽事方發覺有司具以上聞元宗切責名品
將加黜削公一無所受乃進諫焉元宗納之遂御花萼樓一切釋
放舉朝皆謝公衣冠儼然獨立不拜翌日入奏元宗謂公曰古人
以清白遺子孫乃卿一人而已公曰含章之賄偶不至臣門非不
受也元宗深嘉歎之前碑闕焉故略述於此公第三子渾之爲中

丞也方欲陳乞御製碑頌未果而中受譴責旋羯胡作亂事竟不成眞卿時忝監察殿中爲中丞屬吏故公孫儼泣請眞卿論譔之昭義軍節度觀察使尙書左僕射兼御史大夫平陽郡王薛公曰嵩以文武忠義之姿爲國保障上慕公之德業歎尙無窮次嘉儼之懇誠崇豎莫致廼命屯田郎中權邢州刺史封演購他山之石曳以百牛僦刻字之工成乎半歲磨礪旣畢建立斯崇遠近嗟稱古今榮觀雖大賢爲德樹善庸限於存亡而小子何知附驥托跡於階序眞卿刺湖州之日因成文請儼刻其側而志之未及雕鐫而第六子衡因謫居沙州參佐戎幕河隴失守介於吐蕃以功累拜工部郎中兼御史河西節度行軍司馬與節度周鼎保守燉煌僅十餘歲遂有中丞常侍之拜恩命未達而吐蕃圍城兵盡矢窮爲賊所陷吐蕃素聞太尉名德曰唐天子我之舅也衡之父舅賢相也落魄如此豈可留乎遂贈以駝馬送還於朝大厯十二年十一月以二百騎盡室護歸士君子偉之乃古來所無也上欲特加

超獎且命待制於側門十三年春三月吏部尙書顏真卿記

唐洪州百丈山故懷海禪師塔銘

陳翊

星纏斗次山形鷲立桑門上首曰懷海禪師室於斯塔於斯付大法於斯其門弟子懼陵谷遷貿日時失紀託於儒者銘以表之西方教行於中國以彼之六度視我之五常遏惡遷善殊塗同轍唯禪那一宗度越生死大智慧者方得之自雞足達於曹溪紀牒詳矣曹溪傳衡嶽觀音臺懷讓和上觀音傳江西道一和上闕二詔謚爲大寂禪師大寂傳大師中土相承凡九代矣大師太原王氏福州長樂縣人遠祖以永嘉喪亂徙于閩隅大師以大事因緣生於像季託孕而薰羶自去將誕而神異聿來成童而靈聖表識非夫宿植德本曷以臻此落髮于西山慧照和尙進具于衡山法朝律師旣而歎曰將滌妄源必遊法海豈惟心證亦假言詮遂詣廬江閱浮槎經藏不窺庭宇者積年旣師大寂盡得心中言簡理精貌和神峻睹卽生敬居常自卑善不近名故先師碑文獨晦其稱

號行同於眾故門人力役必等其艱勞怨親兩忘故棄遺舊里賢
愚一貫故普授來學常以三身無住萬行皆空邪正並捐源流齊
泯用此教旨作人表式前佛所說斯爲頓門大寂之徒多諸龍象
或名聞萬乘入依京輦或化洽一方各安郡國唯大師好耽幽隱
棲止雲松遺名而德稱益高獨往而學徒彌盛其有徧探講肆歷
抵禪關滯著未祛空有猶閔靡不緘藏萬里取決一言疑網雲張
智刃冰斷由是齊魯燕代荆吳閩蜀望影星奔聆聲颺至當其饑
渴快得安隱超然懸解時有其人大師初居石門依大寂之塔次
補師位重宣上法後以眾所歸集意在遐深百丈山碣立一隅人
烟四絕將欲卜築必俟檀那伊蒲塞游暢甘貞請施家山願爲鄉
導庵廬環遶供施苜積眾又踰於石門然以地靈境遠頗有終焉
之志元和九年正月十七日證滅於禪床報齡六十六僧臘四十
七以其年四月廿二日奉全身窆于西峰據婆娑論文用淨行婆
羅門葬法遵遺旨也先時白光去室金錫鳴空靈溪方春而涸流

杉燎竟夕以通照妙德潛感于何不有門人法正等嘗所稟奉皆得調柔遞相發揮不墜付屬他年紹續自當流布門人談敘永懷師恩光崇塔宇封土累石力竭心瘁門人神行梵雲結集微言纂成語本凡今學者不踐門闕奉以爲師法焉初闍越靈藹律師一川教宗三學歸仰嘗以佛性有無嚮風發問大師寓書以釋之今與語本並流於後學翊從事於江西府備嘗大師之法味故不讓眾多之託其文曰

梵雄設教有權有實未得頓門皆爲暗室祖師戾止方傳祕密如彼重昏忽懸白日其唯此大士宏紹王宗雖修妙行不佳真空無

假方便豈俟磨礱恬然返本萬境圓通其百千人眾盡祛病熱彼

皆有得我實有說心本不生形同示滅此土灰燼他方水月其法

傳人代塔閉山原杉松日暗寺塔猶存藹藹學徒無非及門唯能

覺照是報師恩

其四

杭州徑山寺大覺禪師碑銘

并序

李吉甫

如來自滅度之後以心印相付囑凡二十八祖至菩提達摩紹興
大教指授後學後之學者始以南北爲二宗又自達摩三世傳法
於信禪師信傳牛頭融禪師融傳鶴林馬素禪師素傳於徑山山
傳國一禪師二宗之外又別門也於戲法不外來本同一性惟佛
與佛轉相證知其傳也無文字語言以爲說其入也無門階徑術
以爲漸語如夢覺得本自心誰其語之國一大師其人矣大師諱
法欽俗姓朱氏吳都崑山人也身長六尺色像第一修眸運數方
口如丹疑焉若峻山清孤泊焉若大風海上故揖道德之器者識
天人之師焉春秋二十有八將就賓貢途經丹陽雅聞鶴林馬素
之名往申欵謁還得超然自詣如來密印一念盡傳王子妙力他
人莫識卽日剃落是真出家因問以所從素公曰逢徑則止隨汝
心也他日遊方至餘杭西山問於樵人曰此天目山之上徑大師
感鶴林逢徑之言知雪山成道之所於是蔭松藉草不立茅茨無
非道場於是宴坐之久邦人有構室者大師亦因安處心不住於

三界名自聞於十方華陰學徒來者成市矣天寶二祀受具戒於龍泉法崙和尚雖不現身意亦不捨外儀於我性中無非自在大曆初代宗睿武皇帝高其名而徵之授以肩輿迎於內殿旣而幡幢設列龍象圍繞萬乘有順風之請兆民渴灑露之仁問我所行終無少法尋制於章敬寺安置自王公逮於士庶其詣者日有干人司徒楊公綰情遊道樞行出人表大師一見於眾二三目之過此默然吾無示說楊公亦退而歎曰此方外高士也固當順之不宜羈致尋求歸山詔允其請因賜策曰國一大師仍以所居爲徑山寺焉初大師宴居山林人罕接禮及召赴京邑途經郡國譬若優曇一現師子聲聞晞光赴響者轂擊肩摩投衣布金者邱累陵聚大師隨而檀施皆散之建中初自徑山徙居於龍興寺餘杭者爲吳東藩濱越西境馳軺軒者數道通濱驛者萬里故中朝銜命之士於是往復外國占風之侶盡此奔走不踐門闕恥如瘖聾而大師意絕將迎禮無差別我心旣等法亦同如貞元八年歲在壬

申十二月二十八夜無疾順化報齡七十九僧臘五十先是一日
誠門人令設六齋其徒有未悟者以日暮恐不克集事大師曰若
過明日則無所及旣而善緣普會珍供豐盈大師意若辭訣體無
患苦逮中宵跣趺示滅本郡太守王公顏卽時表聞上爲歔歔以
大師元慈默照負荷眾生賜諡曰大覺禪師海內服膺於道者靡
不承問叩心悵惘號慕明年二月八日奉全身於院庭之內遵遺
命也建塔安神申門人之意也嗚呼爲人尊師凡將五紀居惟一
床衣惟一衲冬無纊夏不絺裕遠近檀施或一日累千金悉命
歸於常住爲十方之奉未嘗受施亦不施人雖物外去來而我心
常寂自象教之興數百年矣人之信道者方惴畏於罪垢愛見於
莊嚴其餘小慧則以生滅爲心垢淨爲別捨道由徑傷肌自瘡至
人應化醫其病故大師貞立迷妄除其瘳冥破一切相歸無餘道
乳毒旣去正味常存眾生妄除法亦如故嘗有設問於大師曰今
傳舍有二使郵吏爲刲一羊二使旣聞一人救一人不救罪福異

之乎大師曰救者慈悲不救者解脫惟大師性和言簡罕所論說
問者百千對無一二時證了義心依善根未度者道豈遠人應度
者吾無雜味日行空界盡欲昏癡珠現鏡中自然明了或居多靈
異或事符先覺至若飲毒不害遇疾不醫元鶴代闡植柳爲蓋此
昭昭於視聽者不可備紀於我法門皆爲妄見今不書尊上乘也
弟子實相門人上首傳受祕藏導揚真宗甚乎有若似夫子之言
庚桑得老聃之道以吉甫連蹇當代歸依釋流俾筌難名強著無
蹟其詞曰

水無動性風止動滅鏡非塵體塵去鏡澈眾生自性本同諸佛求
法妄纏坐禪心沒如來滅後誰證無生大士密授真源湛明道離
言說法潤根莖師心是法無法修行我體本空空非實性旣除我
相亦遣空病譬如乳毒毒去味正大師得之斯爲究竟何有涅槃
適去他方教無生滅道有行藏不見舟筏空流大江蒼蒼遙山成
道之所至人應化萬物皆覩報盡形滅人亡地古刻頌豐碑永存

澗戶

人應平佛性皆歸淨無染人亡此古德拾遺經云
用亦空而無取非管攝之末五六願之世復矣
言其出歸淨心最甚無去計非離本空空其
國坐禪心到取末無對諸無治大土齊外
風土而如無此強難去與難取主自封本
以言南聖當力制離對空其清照
入土首言受無難與真宗甚平身法天
不問世法不問世法不問世法不問世法
言其本曰自空界盡於看鐵來與鐵中自然
言其百千性無一二劫盡了善心必善未與
唐文粹補遺卷第十二 不列首補遺對大而對時言前罕海歸